

## 'EMEO XOP YŌG TAPPET

### *Topak-tok*

<sup>1</sup> Hōmā hāmyāxatamuk xohix hā Topa te hām'āktux pax, tu hām'āktux punethok Yoneo xop yōg mōnāyxop pu', ha tik xop te Topa pupi hām'āktux, nūy mōnāyxop pu' xuktux,

<sup>2</sup> pa Topak-tok te yāy Tak pupi hām'āktux nōmhā, tu yūmū'ā' xuktux. Nō'ōm te Topa yūmūg Tak mūtik hām xexka xop xohix mīy, ha Topa tek-tok yāykutnāhā', pu hām xexka yōg hāpxop xohix pop, xix pexkox yōg hāpxop xohix pop kamah,

<sup>3</sup> yāk-tok max, tu Topa max xe'ēgnāg putuk, tu yā Topa xe'ēgnāg kamah. 'Ūyīy'ax ka'ok, hu hām xexka xop xohix xat, xix pexkox xop xohix xat, pu tu pip ka'ok, ha māyōn xop mām ka'ok, xix kōnāg xexka xup ka'ok kamah, ha tikmū'ūn kuxa kummuk tupmāhā', tu' tupmā kux, 'ihā pexkox ha' mōg, tu Topa xexka xe'ēgnāg yīm xe'e hā' yūm.

### *Topak-tok xix pexkox yōg nū'pok xop*

<sup>4</sup> Pexkox yōg nū'pok xop xexkak-tōgnāg, ha Topak-tok xexka xe'ēgnāg, yīy Topa te nū'pok xop 'āxet'ax ka'ok mīy, tuk-tok 'āxet'ax mīy max xe'ēgnāg.

<sup>5</sup> 'Ap ta nū'pok xop pu hām'āktux'ah, nūy yā nōm xop yāy kutok 'āktux hok, pa yāy kutok pu hām'āktux, hu:

“Āmūn yā 'ūgkutok.

Hōnhā 'āte 'āmūn yāk kutok 'āktux,” Kaxīy.

Tu xe hām'āktux, hu:

“Ūgmūn yā 'ōg 'Ātak.  
Yā 'āmūn yāk kutok,” kaxīy.  
Tuk-tok pu' xuktux.

<sup>6</sup>Tuk-tok puxet nū'kutnāhā hāhām tu', ha' xip ta tu',  
ha:

“Pūyā pexkox yōg nū'pok xop xohix kuxa' yēy  
'ākeppah,  
nūy tu nūktettex,” kaxīy.

<sup>7</sup>Pa nū'pok xop 'āktux, hu:

“Pūyā tu hām mō'ka'ok, kuxap putuk,  
pūyā nōm kāmānat xop yā ka'ok,  
tu 'āmuuh putuk kamah,” kaxīy.

<sup>8</sup>Tu yāy kutok pu hām'āktux, hu:

“Topah, xate' xat mō kuma 'āmōg, tu' xat kux  
'ohnāg,  
tu 'ōg tikmū'ūn xat max, nūy tu hāmyok mīy.

<sup>9</sup>Xate hāmyok mīy'ax putup pax, xix hāpkohe mīy'ax  
putup nōg,

yīy 'ōgnū Topa te xa yāy kutnāhā', xa tikmū'ūn hā  
'āxexka',

nūy 'ākuxa hittup xexka', ha 'āxapek-tōgnāg xop,”  
kaxīy.

<sup>10</sup>Tu xe yāy kutok pu hām'āktux, hu:

“Hōmā 'āmūn te māxap, tu hām xexka xohix mīy,  
yāy yīm hā pexkox mīy, tu hāp xop xohix mīy.

<sup>11</sup>Ha pexkox te yāy xaxogāp-tup, tu' nōg,

xix hāhām te yāyxaxogāp-tup, tu' nōg,

pa ta tu 'āxip ka'ok,

ha hāmyāxatamuk xohix punethok nōg, puxix  
pexkox xix hāhām kutut,

tu' nōg putup, tu topixxax kutut putuk nōg,

<sup>12</sup>ha tikmū'ūn te topixxax kutut xut,

nūy nō tup hā' yānān, nūy tu mō'tat,

ha kaxīy xate pexkox xut putup, xix hām xut  
 putup,  
 nūy nō nōy yānān tup mīy,  
 pa 'āxip ka'ok, tu kutut 'ohnāg," kaxīy.  
<sup>13</sup> Ha Topa te pexkox yōg nū'pok xop xānā 'ōhnāg,  
 pu yūhūm, pa yāy kutok xānāhā', hu:  
 "Yūhūm 'ūgyīp xe'e hā, 'āte nōm kummuk xop nōā',  
 yīy hip, 'āte nōm kummuk xop nōā',  
 tu nōm xop xa tu' gāy xop nōā', tu' kummugāp-tup  
 'ūyānān tu',  
 ha ta xate' hip, puyī' xohix yīpkox pi' 'āxat'ax tu',"  
 kaxīy.

<sup>14</sup> Tep te xīy pexkox yōg nū'pok xop? Yā' koxuk  
 xe'e xop, tu Topa pu hāpxopmāhā', ha nū'pok,  
 nūy yāy yōg tikmū'ūn mō'nīynām, puyī' mōg, hu  
 mōxakux pexkox tu'.

## 2

### *Topa te tikmū'ūn kuxa kummuk xit*

<sup>1</sup> Āpu yūmūg yīpkox pip, hām'āpak max'ax pu  
 yūmūg yīpkox pip, 'ūyīy hāpxopmā kummuk hok.

<sup>2</sup> Pexkox yōg nū'pok xop te hām'āktux, tu  
 hāpxe'e 'āktux, ha Topa te' yīpkox hok xop pu  
 hāpkummugāhā',

<sup>3</sup> Tu yūmūg kuxa kummuk xit'ax, tu yūmū'ā  
 hāmmax xe'ēgnāg nā'ax, pa yūmūg yīpkox hok,  
 puxix Topa yūmū'ā hāpkummugā xexka', yūmū'āte  
 Yeyox yōg hām'āktux putup nōg hah. Ha' xuktux  
 hāmāxap, ha hām'āpak xop te' yīkopit, tu hāpxe'e  
 'āktux,

<sup>4</sup> ha Topa te hāpxe'e 'āktux kamah, hu hāpxopmā  
 ka'ok xe'ēgnāg, yā hāpxopmā xe'ēgnāg punethok,  
 pu tikmū'ūn pēnā, nūy kuxa' yēy, yā tikmū'ūn te

nõm mĩy hok. Ha Topa Koxuk tep-tup pax, hu tikmũ'ũn ka'ogãhã', pu hãpxopmã ka'ok.

*Yeyox Kunnix te' kuxa kummuk xit*

<sup>5</sup> Ha Topa te pekkox yõg nũ'pok xop yĩmõgatux 'ohnãg, pu pekkox tu 'ũyõg tikmũ'ũn xat. 'Ãmhok. Pãyã yãy kutok Yeyox yãykutnãhã pu tu xat.

<sup>6</sup> Ha Topa yõg tappet te:  
 “Tikmũ'ũn yãk-tõgnãg, pãyã Topa te nõm hãmp'e'paxex, nũy 'ũxutigã'.

<sup>7</sup> Ha hõnhã tikmũ'ũn kutõgnãg, ha pekkox yõg nũ'pok xop xexka',  
 pa Topa te tikmũ'ũn xexkãnhãhã', pu tu xat,

<sup>8</sup> Tu' ka'ogãhã', pu tu hep xop xohix xat,” kaxĩy.

Hamũn. Tappet te' hep xop xohix xat'ax 'ãktux, 'a yũmũ'ãte' pẽnã'ah nõmhã, 'ap tikmũ'ũn te' hep xop xohix xat pẽnã'ah.

<sup>9</sup> Pãyã yũmũg kuxa te Yeyox pẽnãhã', yã hãpxip kutõgnãg 'ĩhãk-tõgnãg, Topa tep-tup hak-tõgnãg, ha nũ'pok xop xexka', pa Yeyox xok, tu' hep xop xohix pupi' xok, pu Topa yũmũ'ã hãmmãxnã', hu' xexkãnhã xe'ẽgnãg nõmhã, 'ũxok hah xexkãnhãhã'.

<sup>10</sup> Topa te hãpxop xohix mĩy, 'ũp-tup tu' mĩy, tuktok xop putup, puyĩy tu max xe'ẽgnãg, nũy Topa putuk tu max xe'ẽgnãg. Yĩy Yeyox xũy, pu Topa' xũy'ax hã Yeyox yõg hãpxopmã'ax kuxyã'. Yã Yeyox te Topa yõg putat hã yũmũg mõgãhã'.

<sup>11</sup> Tu tikmũ'ũn kuxa kummuk tupmãhã', ha nõm xop te Topa hã' Tak, yã Topa te' kuxa mãm ka'ok xop hã 'Ãtak, yĩy Yeyox yãy xape xop 'ãktux, 'ap xape tu yãyhãhup'ah.

<sup>12</sup> Yĩy tappet te Yeyox yõg hãm'ãktux'ax 'ãktux, hu:  
 “Topah, 'ãtek xape xop pu 'ãmũn 'ãktux putup,

tu 'õg hãpxopmã'ax ka'ok 'ãktux putup,  
tu xa kutex putup, nũy Topa hãm'ãktux max,  
puyĩy tikmũ'ũn xohix yãykotĩnnãnã' pip," kaxĩy.

<sup>13</sup> Ha tappet te xe:

“Topah, 'ũgkuxa yũm ka'ok 'ãmũn kopah,” kaxĩy.

Tu xe:

“Nũntek xip, 'ũgkutok xop tek mũtik pip,  
Topa te 'ũgkutok popmãhã',” kaxĩy.

<sup>14</sup> Yeyox tek-tok 'ãktux, ha tikmũ'ũn xe'e', 'ap  
koxuk'ah, yã' yĩn pip, xi' yĩn hep 'ãta', yĩy Yeyox  
te yũmũ'ã hã tikmũ'ũn kutok, nũy tu xok, nũy  
Hãmgãyãgnãg nõã', nõm tep-tex.

<sup>15</sup> Ha tikmũ'ũn kuxãnõg, tu' xok'ax yĩpkutuk,  
'ũyõg hãmyãxatamuk xohix hã' yĩpkutuk, ha Yeyox te  
nõm xop kuxa mãmãhã, nũy nõ kuxãnõg kuxyã',  
pu tu hittup.

<sup>16</sup> Yeyox nũn. Tep ha' nũn? 'Ok nũn, nũy pexkox  
yõg nũ'pok xop mõ'nĩynãm? 'Ãmhok. Yã Topa yõg  
tappet te: 'Ũnũn, nũy mõnãyxop hittap 'Amanãm  
mõkputox hã tu tehet,” kaxĩy.

<sup>17</sup> Hamũn. Yĩy Yeyox yãyhã tikmũ'ũn kutok, nũy  
tu xape xop putuk, nũy xape hã 'ãmãnex xexka  
xe'ëgnãg. 'Ũmax, tu tikmũ'ũn kuxa ka', tu Topa tu  
hãpxopmãhã', tu tuknõg 'ohnãg, nũy tikmũ'ũn yõg  
hãpkummuk mĩy'ax xaxogã', pu tu kux.

<sup>18</sup> Yã Yeyox xũy, tu yãy putup'ax mĩy 'ohnãg, hu  
hõnhã tikmũ'ũn hã tu' tehet, tu' ka'ogãhã', puyĩy  
tu yãy putup'ax mĩy hok kamah, nũy hãpxopmã  
kummuk hok.

### 3

*Yeyox xix Mõyyex*

<sup>1</sup> 'Ākuxa mām ka'ok Yeyox kopah, huk mūn hā 'āxape xop, ha Topa te 'āxānāhā kamah. 'Āpu Yeyox 'ūm pe'āpaxeh, yā Topa te nū'kutnāhā', pu 'āmānex xat'ax yōg hām'ax hā tu' hām, ha yūmūg kuxa mām ka'ok nō 'āmānex xat'ax kopah.

<sup>2</sup> Topa te Yeyox yāy'kutnāhā', pu tu hāpxopmā', ha kaxīy mōnāyxop hittap Mōyyex te hāpxopmā max, yāy xape xop xohix kopa hāpxopmā max, tu' tuknōg 'ohnāg.

<sup>3</sup> Tikmū'ūn te mīptut max pe'paxex kutōgnāg, pa tikmū'ūn te mīptut mīy, ha nōm tu pe'paxex xexka'. Kaxīy mōnāyxop hittap Mōyyex yā xexka 'Iyaet yōg tikmū'ūn kopah, ha Yoneo xop te nōm 'āktux max, pāyā Yeyox mūn xexka xe'ēgnāg, tu Topa yōg tikmū'ūn xohix hā' xuxyā', yā Topak-tok xe'e'.

<sup>4</sup> Kaxīy mīptut 'ūm te yāy 'ūm mīy 'ohnāg, ha Topa te hāpxop xohix mīy. Hōmā Topa te 'Iyaet yōg mōnāyxop xānāhā', puyīy yāy hā tikmū'ūn.

<sup>5</sup> Mōyyex hām Topa pu', 'ūyōg kāmānat tu', tu yāy xape xop kopa' hām, tu tuknōg 'ohnāg, tu Topa pupi tikmū'ūn pu hām'āktux, tu: “Topa te hām'āktux putup,” kaxīy.

<sup>6</sup> Pa Kunnix te hāpxopmā xexka', tu' tuknōg 'ohnāg, yāy Tak pu' hām tu', tu yāy xape xop pēnā max, ha Kunnix hā yūmūg xape, 'ihā yūmūg kuxānōg hok, 'ihā yūmūg kuxa mām ka'ok, tu hāmmax hip.

<sup>7</sup> Yīy Topa Koxuk te:

“Hōnhā 'āxop te Topa yīy'ax 'āpak,

<sup>8</sup> 'Āpu, 'īpkox pi', ka 'ōg mōnāyxop yōg hāpxopmā'ax mō'tat,

ha mōnāyxop yīpkox 'ohnāg, tu Topa gāyāhā',

‘Īhã hãm panip xexka tu' pip,” kaxĩy.

<sup>9</sup>Tu xe:

“‘Ōnte 'ōg mōnāyxop tek yīkopit, tuk gāyāhã',  
pāyã yōgnũ hãpxopmã'ax xe'ēgnāg pēnã tap,  
hãmyāxatamuk xohix te 40 hã' pēnãhã',

<sup>10</sup>Yīk gāy nãm nōm tikmũ'ũn tu', tu:

‘Yã' kummuk pax, tu hãmpe'paxex kummuk,  
tu yōgnũ putat xak punethok, hãpkummuk mĩy hu',

<sup>11</sup>huk gāy, tu yāy 'āxet'ax hã hãm'āktux xex, hu:

‘Nōm xop tek xip'ax hã mō'āxakux hok,

nũy 'ūgmũtik tu hãpxopmã kux hok,' kaxĩy.”

<sup>12</sup>‘Ūkxape xop, 'ōg pa 'āti', ka Topa yōg putat xak,  
'ākuxa kummuk tu' xak, xix 'ākuxa mãm hok tu' xak,  
ka Topa xe'ēgnāg nĩm.

<sup>13</sup>‘Āpu hōnhã mō 'ānōy mō'nĩynãm, 'āmnĩy xohix  
hã mō'nĩynãm, 'Īhã Topa te tikmũ'ũn xãnãhã', puyĩy  
Topa pu' yīpkox pi'. Yã hōmã Topa yōg tappet te  
hōnhã 'āktux, tu: “Hōnhã Topa te hãm'āktux,” kaxĩy.  
'Āpu, 'āxop yāy nōy ka'ogã', ka 'āyīpkox mo' yāy  
yīnnĩn, yāy pu' koit tu', xayĩy hãpxopmã kummuk  
hok.

<sup>14</sup>Hōmã yũmũg kuxa mãm ka'ok Kunnix kopah,  
yã yũmũg kuxa mãm ka'ok mō kumak mōg, kopxix  
Kunnix hã yũmũg xape'.

<sup>15</sup>Yĩy Topa yōg tappet te:

“Hōnhã 'āxop te Topa yĩy'ax 'āpax, 'āpu 'āyīpkox pi',  
ka mōnāyxop yōg hãpxopmã'ax tat,  
ha mōnāyxop yīpkox 'ohnāg,  
tu Topa mũtik yāytuk-mĩy,” kaxĩy.

<sup>16</sup>‘Ū 'ũm te Topa yōg hãm'āktux'ax 'āpak, tu nũ  
mũtik yāy tuk-mĩy? Yã mōnāyxop te Mōyyex pe'

mōg, tu hām'āpak, tu yāytuk-mīy, ha Mōyyex te nōm mōy tap hāpxexka 'Eyit kopah.

<sup>17</sup> Ũ 'ūm tu Topa gāy hāmyāxatamuk xohix te 40 hā ta tu' gāy? Yā tikmū'ūn te hāpxopmā kummuk, hu' xakix hām panip xexka tu'.

<sup>18</sup> Ũ 'ūm te Topa yōg hām'āktux'ax 'āpak, 'ihā' yāy 'āxet'ax hā hām'āktux xex, hu: “Ōm xop 'ūkxip'ax hā mōxakux hok, nūy 'ūg mūtik tu hāpxopmā kux hok,” kaxīy? Yā tikmū'ūn te hām'āktux'ax 'āpak, tu Topa mūtik yāytuk-mīy.

<sup>19</sup> Yīy yūmū'āte hāmyūmmūg, yā' mōxa 'ohnāg, nūy Topa yōg xip'ax hā mōxakux, 'ūkuxa mām 'ohnāg tu' mōxa 'ohnāg.

## 4

<sup>1</sup> Hōmā Topa te yūmū'ā hām'āktux xex, tu hām'āpak max'ax 'āktux, hu: “Ūkxip'ax hā mō'āxakux'ax, nūy 'ūgmūtik 'āpi',” kaxīy. 'Āpu, yūmūg pa 'āti', nūy Topa yōg xip'ax hā mōxakux xe'e'.

<sup>2</sup> Tikmū'ūn hittap te' xupak, ha yūmū'āte' xupak kamah, tu hām'āpak max'ax 'āpak, kamah, pa tikmū'ūn hittap kuxa 'ūm mām 'ohnāg Topa kopah, yīy Topa te nōm pu hāmmaxnā 'ohnāg, 'ūkuxa mām 'ohnāg hah,

<sup>3</sup> ha yūmūg kuxa mām ka'ok, tu Topa xip'ax hā mō yūmū xakux, nūy Topa mūtik hāpxopmā kux, ha:

“Ūggāy, hu yāy 'āxet'ax hā hām'āktux xex, hu: 'Nōm xop tek xip'ax hā mōxakux hok, nūy 'ūgmūtik tu hāpxopmā kux hok.' Kaxīy.”

Topa te' xuktux tap, 'ihā tu hām xexka xohix mīy tu hāpxopmā kux.



4 Yã Topa yõg tappet te hãptup te 7 'ãktux, yã hãptup xe'e', hu: "Topa te hãpxopmã kux, tu hãptup te 7 'ĩhã hãpxopmã 'ohnãg, hãpxopmã kux tu,'" kaxĩy.

5 Tu xe: "Nõm xop te Topa xip'ax hã mõxakux hok, nũy nũ mũtik tu hãpxopmã kux hok," kaxĩy.

6 Tikmũ'ũn hittap te hãm'ãpak'ax max 'ãpak hãmãxap, tu Topa xip'ax hã mõxakux hok, nũy nõm mũtik tu hãpxopmã kux hok, 'ũkuxa mãm 'ohnãg tu', pãyã' nõy xop mõxap-tup, nũy Topa mũtik tu hãpxopmã kux.

7 Hãmyãxatamuk xohix nõg 'ĩhã Topa Koxuk te xe hãm'ãktux, ha mõnãyxop Namix te Topa pupi hãm'ãktux, yĩy:

"Hõnhã 'ãxop te Topa yĩy'ax 'ãpak.

'Ãpu, 'ipkox pi'," kaxĩy.

8 Pax pu mõnãyxop hittap Yoyoe te tikmũ'ũn mõgã, pu Topa xip'ax hã mõxakux, nũy tu hãpxopmã kux, puxix Topa xe' xuktux hok mõnãyxop Namix pu'. Pãyã mõnãyxop mõxa 'ohnãg, 'ũyĩpkox 'ohnãg tu', yĩy Topa te' xuktux 'ũxeheh.

9 Pa hãptup xe'e mõ'nãhã Topa yõg tikmũ'ũn pu', nõm xop kuxa mãm ka'ok xop pu mõ'nãhã', tu Topa yõg hãptup te 7 putuk, 'ĩhã Topa te hãpxopmã kux.

10 Tikmũ'ũn te Topa xip'ax hã mõxakux, nũy nõm mũtik tu hãpxopmã kux, puxix hãpxopmã'ax xohix tu kux, tu xe hãpxopmã 'ohnãg, Topa te hãpxopmã kux putuk.

11 'Ãpu yũmũ'ã Topa xip'ax hã mõxakux kamah, nũy Topa mũtik yũmũg hãpxopmã kux. 'Ãpu yũmũg

yīpkox pip Topa pu', ku'u yūmūg tikmū'ūn kum-  
muk putuk, tu yūmū'āte mōxakux 'ohnāg.

12 Yā Topa yōg hām'āktux xip ka'ok. Tikmū'ūn  
mīkax xexka 'ūxox tix hā' xuhmīy, tu' xuhmīy nūy  
'ūyīn xit, nūy tu' kup mūggā'. Ha kaxīy Topa yōg  
hām'āktux ka'ok, tu yūmū'ā yāy kuxa yūmmūgāhā'.  
Yūmū'āte mō'kupix, xix hām'āpax, puxix nōm  
hām'āktux yāy pekpaxex'ax yūmmūgā', tu yāy  
pekpaxex xohix yūmmūgāhā' xix yāy putup'ax  
yūmmūgāhā', 'ūyīy yāy kuxa yūmmūg,

13 yīy tikmū'ūn te hāpxopmā'ax xaptop hok Topa  
pu'. Yā Topa te hāpxopmā'ax xohix pēnāhā', tu  
hāmyūmmūg, tu tikmū'ūn yōg hāmpē'paxex xohix  
yūmmūg, ha Topa pu yūmūg xohix te yāy yōg  
hāpxopmā'ax 'āktux putup.

### *Yeyox te 'āmānex xop xohix xat'ax*

14 'Āpu yūmūg kuxa mām ka'ok, yā hōmā  
yūmū'āte hām'āktux, tu yūmūg kuxa mām ka'ok  
Yeyox kopa 'āktux. Yūmū yōg 'āmānex xat'ax  
xe'ēgnāg te Topa ha' mōg, tu' keppa' xip, yā'  
xuxet'ax Topak-tok Yeyox.

15 Tu yūmūg kuxa ka', yūmūg pu'uk ha  
yūmūg kuxa ka', ha' kummuk xop te yūmū'ā'  
kummugāhā', 'ūyīy hāpkummuk mīy, tu Yeyox  
kummugāhā kamah, puyīy hāpkummuk mīy, pāyā  
hāpkummuk mīy 'ohnāg.

16 'Āpu yūmūg mōg, yūmūg kuxānōg hok. Yā Topa  
ha yūmūg mōg, nūy nōm pu hām'āktux, ha Topa te  
yūmū'ā hāmmāxnāhā', xix yūmūg kuxa ka', xix mō  
yūmūg nīynām.

## 5

<sup>1</sup> Topa te 'āmānex xat'ax yāyikutnāhā', tu tikmū'ūn kopa' yāyikutnāhā', pu tikmū'ūn pupi hām'āktux Topa pu', ha Topa te 'āmānex xohix yīmōgatux, pu xokxop mō'hap, xix hāpxop, nūy Topa pu haxyā', puyīy Topa tikmū'ūn yōg hāpkummuk mīy'ax xaxogā', pu tu kux.

<sup>2</sup> Ha 'āmānex xat'ax yā pu'uk kamah, nūy hāmyūmmūg hok xop hā' tot, nūy hāpkummuk mīy'ax xop kuxa ka'.

<sup>3</sup> Ūpu'uk, hu yāy mūn pu hāpxop mō'hap hāmāxap, nūy Topa pu' haxyā', puyīy hāpkummuk mīy'ax xaxogā', pu tu kux, hak-nāy tu 'āmānex te tikmū'ūn pu mō'hap kamah, puyīy Topa' yōg hāpkummuk mīy'ax xaxogā' kamah.

<sup>4</sup> Tikmū'ūn te' xak 'ohnāg pu Topa yāyikutnā', puyīy tu 'āmānex xat'ax. 'Āmhok. Topap-xehnāg te yāyikutnāhā', tu mōnāyxop 'Anām yāyikutnā hāmāxap.

<sup>5</sup> Ha kaxīy Kunnix te' xak 'ohnāg, pu Topa' yāyikutnā', puyīy yāyhā 'āmānex xat'ax. 'Āmhok. Pa Topa te:

“Āmūn yāk kutok!

Hōnhā 'āte xa hā 'ūgkutok 'āktux,” kaxīy.

<sup>6</sup> Ha Topa yōg tappet te xe hām'āktux, hu:  
 “Tik hittap Mēkiyenek yā 'āmānex mō kuma' mōg, hā kaxīy 'āmūn yā 'āmānex mō kuma mōg kamah, tu' kux 'ohnāg,” kaxīy.

<sup>7</sup> Yeyox xip hām tu', 'ihā Topa pu hām'āktux, tu ta tu' xak, tu' yīy ka'ok, tu' potaha', pu Topa' tux hok pu tikmū'ūn putex hok, ha Topa te' xupak. Yā yāyikutōgnāg pe'paxex hah.

8-9 'Ūk-tok, pāyā' xūy, nūy tu yīpkox pip yūmmūg, tu hāmyūmmūg max, hu tikmū'ūn kuxa kummuk xit'ax, tu tikmū'ūn yīpkox pip xop kuxa kummuk xit'ax, nūy tu mō kuxa max tat 'ūyānān tu'.

10 Yā Topa te yāy kutok yāy kutnāhā', puk-tok yāyhā' xat'ax, tuk-tok pu hām'āktux, hu:

“Āmūn yā 'āmānex xat'ax, tu tik hittap Mēkiyenek putuk,” kaxīy.

### *'Ōg pa mōxip, xayīy kuxa yūm kux*

11 Yā 'ūgmū'āte 'āmānex 'āktux pu' max, nūy xa Yeyox 'āktux, yā yūmū yōg 'āmānex xat'ax, ha xa hām'āktux punethok, nūy xa hāmyūmmūgā', pāyā 'āp-tox ka'ok.

12 Hāpxip punethok hā 'āxop te Topa yōg hām'āktux'ax 'āpak, pāyā 'āxop te hāpxaxok, hu 'ānōy pu hāmyūmmūgā' hok. Kaxop te hāmyūmmūg 'ohnāg, tu' yōktat puxehnāg xak, hu' xo'op, 'ap te xogyīn mā'ah. Hā kaxīy 'āxop te hām'āpak kutōgnāg, tu hāmyūmmūg 'ohnāg, kaxop putuk, 'ap hām'āktux ka'ok 'āpak'ah, 'āp-tox tuknōg tu'.

13 Kaxop pu'ūgnāg te' yōktat hep xo'op, tu hāmyūmmūg 'ohnāg, 'ok pe hāmyok, 'ok pe hāpkohe'. Hā kaxīy 'āxop te hām'āktux te māxap yūmmūg, pāyā hām'āktux ka'ok yūmmūg 'ohnāg, hu hāpxopmā'ax kopit kummuk.

14 Yā' xiptap xop te xogyīn māhā', tu hāmyūmmūg, tu hām'āktux ka'ok pe'paxex, nūy tu hāmmax yūmmūg, nūy tu hāpkummuk yūmmūg, puyīy hāpxopmā max.

## 6

<sup>1</sup> 'Āpu yūmū hāmpē'paxex max, nūy hāmyūmmūg, nūy 'ūxiptap xop putuk yūmū'āte hāmyūmmūg, nūy hāmyūmmūg'ax te māxap yūmmūg max. Yā nōm hāmyūmmūg'ax te: Topa te tikmū'ūn kuxa kummuk xit, hāpxopmā'ax hok hā' xit, nūy kuxa max mō'tat 'ūyānān tu'. Tikmū'ūn kuxa yūm ka'ok Yeyox kopah, puxix Topa' hok hā' kuxa xit. Kaxīy. Yā hāmyūmmūg'ax te māxap 'ōhōm, ha yūmū'āte hāmyūmmūg.

<sup>2</sup> Ha kama hāmyūmmūg'ax te māxap, pu' kuxa mām ka'ok xop 'ūnōy putox pix, 'ūkuxa yūm ka'ok hah, ha' nōy putox yīmū' yīm xix, puyīy Topa Koxuk ka'ogā', 'āxop te hāmyūmmūg kamah. Yā kama hāmyūmmūg te māxap, hu: Topa te' xakix xop putpu' hīnnāp-tup, ha hāptup xe'e mō'nāp-tup, 'īhā Topa te' hep xop xohix yōg hāpxopmā'ax kopit, tu' kummugāp-tup 'ūyānān tu', tu hāpxaxok 'ohnāg. Yā hāmyūmmūg te māxap 'ōhōm.

<sup>3</sup> 'Āpu yūmū'āte hām'āktux kuxyā', 'ūyīy hām'āktux nōy 'ūm 'āktux, puyīy Topa yūmū'ā hām'āktux ka'ok yūmmūgā'.

<sup>4</sup> Topa yōg putat xak hok. 'Āxop te putat xak, nūy hāpxopmā kummuk, ta putpu 'ānūn hok. Tikmū'ūn te Topa yōg putat hā' mōg tap, tu pexkox yōg hāpxop paha', Topa Koxuk te nōm ka'ogāhā',

<sup>5</sup> ha Topa yōg hām'āktux max xex 'ūkuxa kopah, tu pexkox ka'ok'ax yūmmūg,

<sup>6</sup> tu Topa yōg putat xak, nūy putpu tu nūn hok, puxix Topa xe' hupmā hok, puyīy yāy yōg hāpxopmā'ax kummuk kux. 'Āmhok. Yā' nōy te Topak-tok 'āktux kummuk, tu Yeyox mūn pu

hãpkummugãhã'. Tu tep putep putuk? Tu' kummuk xop putuk, nõm xop te Yeyox putex, ha' kummuk xop putuk, hu ta Topa yõg putat xak. Yã Yeyox pu' hupmã xexka'.

<sup>7</sup> Hãm max te tex punethok pop, ha hãpxop punethok xokax, tu' tuk, ha hãpxa xuxyã hittup, ha Topa te nõm pu hãmmaxnãhã'.

<sup>8</sup> Ha hãm nõy te mĩmyãm punethok pip, xix mĩxux kummuk pip, yĩy Topa te nõm pu hãpkummugãhã', ha tikmũ'ũn te' gõy hax nãm. Tikmũ'ũn te Topa yõg putat xak, tu hãpxa kummuk putuk, hãpxopmã kummuk tu'.

<sup>9</sup> 'Ũkxape xop: 'Äte hãm'ãktux hã xa hãmyũmmũgãhã', tu hãpxa 'ãktux, nõy xa tikmũ'ũn kuxa 'ãktux. Yã Topa te xa hãmmaxnãhã', 'a 'ãxop te hãpxa kummuk putuk'ah, nõm Topa tep-tup nõg. 'Ämhok. Pãyã 'ãxop te hãpxa max putuk, yã 'ãmõg kuma mõg Topa yõg putat hã.

<sup>10</sup> Topa te hãmyok mĩy, tu 'õg hãpxopmã'ax xaxok 'ohnãg, ha 'ãxop te Topap-tup pax, yĩy 'ãxape hã tu tehet, nõy nõm xop mõ'nĩynãm.

<sup>11</sup> 'Ũgmũ'äte 'ãp-tup, xa 'ãhittup hã Topa yõg putat hã 'ãmõg, nõy tu mõ kuma mõg, nõy pexkox yõg hãpxop hip, nõy pop.

<sup>12</sup> 'Äkuxa tuknõg hok, pa 'äkuxa mãm ka'ok, nõm xop putuk, nõm xop te Topa yõg putat hã' mõg tap, xayĩy pexkox yõg hãpxop pop kamah. Yã Topa te xa hãm'ãktux xex kamah, nõm xop putuk.

### *Topa te hãm'ãktux xex*

<sup>13</sup> Hõmã Topa te hãm'ãktux xex mõnãyxop 'Amanãm pu', tu yã' hitop xex hok, tu' xexka

xe'ëgnäg, ha' xohik-tõgnäg, yīy yāy 'āxet'ax hā hām'āktux, nūy hām'āktux xex,

14 hu 'Amanām pu hām'āktux, hu: “Āte xa hām'āktux xe'e', yā 'āte xa hāmmāxnāp-tup, xate yāy kutok pit put putup, pu 'āmōkputox xohix punethok,” kaxīy.

15 Yīy 'Amanām te' hip, tu mōktu yāy kutok put, tu yāy mōkputox pēnāhā'.

16 Tikmū'ūn 'ūm te' nōy pu hām'āktux xex, hu: Hāptup, kopxix nū', nūy xa pago. Topa te hāmyūmmūg. 'Āte' koit'ah.” Kaxīy. Tu Topa 'āxet'ax 'āktux 'īhā ta tu hām'āktux xex, puyī' nōy kuxa yūm ka'ok hām'āktux'ax kopah, nūy nōy kuxa' yēy.

17 Topa te hām'āktux xe'e', pu tikmū'ūn yīkopit hok, hu yāy 'āxet'ax 'āktux, 'īhā yāy yōg tikmū'ūn pu hām'āktux xex, nōm xop te hāpxop pop'ax pu hām'āktux xex.

18 Topa 'ap te koit'ah, tu hām'āktux xex, xix hāpxopmāhā', tu yāy 'āxet'ax hā hāpxopmāhā', tup te koit'ohnäg, pu yūmūg kuxa mām ka'ok, nūy tu hip, pu Topa yūmū'ā hāmmāxnā', 'ū yūmūg kuxa hittup.

19 Hu yūmūg kuxa mām ka'ok, tu yāy pu yīkopit 'ohnäg, pāyā yūmū'āte' hip, 'ūyīy Topa keppa yūmūg pi'. Mīpkox te kōnäg yīmū' mōg, ha pip-kup putux xexka te mīpkox tu' hīy, tu kōnäg kopa' yūm, puyīy mīpkox mōg hok kōnäg yīmū', ha kaxīy yūmūg kuxa mām ka'ok, tu Yeyox pux-ehnäg kopa' mām ka'ok. Kamah 'āmānex xexka te Topa xip'ax xe'ëgnäg hā mō'nāhā', tu topixxax max mō'yīnnīn'ax hā mō'nāhā', nūy Topa keppa' xhip. Ha yūmū'āte' hip kamah, nūy pexkox yōg xip'ax tu 'āmōxaha', nūy mōxakux, nūy Topa keppa yūmūg pi'.

20 Yeyox te peyox tu' xupep hãmãxap, tu mō'nãhã', nũy yũmũ'ã hãmmaxnã', yã 'ãmãnex xop xat'ax xe'ëgnãg mō kuma' mōg, tu tik hittap Mëkiyenek putuk.

## 7

1 Nõm tik Mëkiyenek te kãmẽn Xanẽm yõg tikmũ'ũn xohix xat, tu Topa xe'ëgnãg hã 'ãmãnex, ha 'Amanãm te' gãy xop mũtik yãykix, tu' xexka xop kix, tu yãykix kux, tu ta' mōg, yãy pet ha putpu' mōg, ha ta Mëkiyenek te' pẽnãhã', tu: “Pũyã Topa xa hãmmaxnã',” kaxĩy.

2 Ha 'Amanãm te' popmãhã hãpxop, 'ũyõg hãpxop yãg te 10, tu 'ãmãnex pu' yãg puxet hõm, ha 'Amanãm te nõm hãpxop mõy tap 'ũgãy xop tu'. Yã Mëkiyenek 'ãxet'ax nõy mĩy, tu: Hãm yok xat'ax, kaxĩy. Ha kãmẽn Xanẽm 'ãxet'ax mĩy, hu: 'Ûkuxa yũm'ax, kaxĩy. Yĩy 'ãmãnex 'ãxet'ax nõy te: Tik te tikmũ'ũn xat'ax, tu tikmũ'ũn kuxa mãmmax'ax, kaxĩy.

3 Ha tikmũ'ũn te 'ãmãnex yãy tak yũmmũg'ah, xi' tut yũmmũg'ah, xi' yõg mõnãyxop yũmmũg'ah, xix hãm 'ũm hã 'ũtut te' put'ax 'ũm yũmmũg'ah, xix 'ãmnyĩ 'ĩhã' xok yũmmũg'ah, yã Topak-tok putuk, tu yã hãm yãxatamuk xohix hã 'ãmãnex, ha' kuxa 'ohnãg.

4 'Ûyũmmũg. Mëkiyenek yã' xat'ax, yĩy mõnãyxop hittap 'Amanãm te' hõm hãpxop yãg puxet, ha' gãyxop tu nõm hãpxop mõy tap.

5 Mõyyex te' xat, pu Nemi mõkputox te tikmũ'ũn tu' yãg puxet pa', 'ũnõy yãg te 10 yã tikmũ'ũn yõg, ha Nemi yõg xop te yãy yõg tikmũ'ũn tu' paha', yã kama 'Amanãm hã' mõkputox.



6 Pa Mēkiyenek mūn 'a Nemi hā' mōkputox'ah, pa 'Amanām tu hāpxop ta tu' yāg puxet paha', tu: "Pūyā Topa xa hāmaxnā'," kaxīy. Yā Topa te 'Amanām pu hām'āktux xex tap.

7 Yā tik xexka xop te hām'āktux, ha tik kutōgnāg xop te hām'āpak. 'Āxop te hāmyūmmūg. Yīy Mēkiyenek te hām'āktux, ha 'Amanām te' xupak.

8 Ha 'āmānex xop te' yāg paha', tu hāpxip 'ihā' xakix, ha' nōy te' yānān tu' paha', tu mōktu xakix kamah, tikmū'ūn xohix putuk. Pa Topa te Mēkiyenek hi xe'e 'āktux, ha mōnāyxop yōg hāpxop 'ūyāg paha'.

9 Yā Nemi te 'Amanām mūtik pago, ha' mōkputox te yāy yōg tikmū'ūn tu' pop.

10 Tikmū'ūn te hām'āktux hu: Nemi mūg tut te' put 'ohnāg, 'ihā' xuxyā 'Amanām te Mēkiyenek pu pago, yīy Nemi te 'Amanām mūtik pago kamah. Kaxīy tikmū'ūn te hām'āktux. Yā mōnāyxop 'Amanām te yāy putix pupi pago.

11 'Īyaet yōg tikmū'ūn te Topa yōg xat'ax yūmmūg, ha' xat'ax te 'āmānex xop 'āktux, 'ōhōm 'Anām mōkputox, yā 'Anām xop te Nemi hā' mōkputox, tu mōktu Topa pu' hām, 'ap puxi'ah, 'ūkuxa tupmā hok tu', yīy 'āmānex nōy nūn, yā Yeyox Kunnix nūn, tu Mēkiyenek putuk, tu 'Anām yōg 'āmānex xop putuk 'ohnāg.

12 Yā 'āmānex nōy, yī' xat'ax nōy kamah.

13-14 Yā yūmūg xuxyā Yeyox nūn, nūy 'āmānex yōg hām'ax hā' hām, tu Yona xop yōg tihik, 'ap Nemi yōg tik'ah, ha Yot xop te 'āmānex yōg hām'ax hā' hām 'ohnāg, yā Mōyyex te Yona xop xat 'ohnāg, pu tu hām.

*Āmānex xat'ax yā Mēkiyenek putuk*

15 Āxop te hāmyūmmūg'ax. 'Ūnūn 'āmānex nōy, tu Mēkiyenek putuk, 'ap Nemi hā' mōkputox'ah.

16 Mōyyex te' xat, pu Nemi mōkputox puxet hām, nūy Yoneo yōg tikmū'ūn hā 'āmānex, ha tikmū'ūn te yāykutnāhā', pu tu hām, pāyā yūmūg xuxyā te yūmū'ā hā 'āmānex xexka', 'ūhi kux 'ohnāg hā yūmū'ā hā 'āmānex.

17 Yīy Topa yōg tappet te: “Tik hittap Mēkiyenek yā 'āmānex, tu' kux 'ohnāg, hā kaxīy 'āmūn yā 'āmānex kamah, 'akux putup 'ohnāg!” kaxīy.

18 Yīy Topa te' xat'ax nōā'. Yā tikmū'ūn pu'uk, 'a hāpxopmā max yūmmūg'ah, tu' yīpkox pip Mōyyex yōg xat'ax pu', Mōyyex te' xat,

19 pāyā yāy kuxa tupmā hok, pu tu max, tu hāmmax hip, pu Topa nūnnā', puyīy tu yāy mūtik ti mō'kuma' mōg. Pāyā Yeyox nūn, yīy yūmū'āte' hip, puyīy yūmūg mōgā Topa yīkāgnāg hah.

20 Yā Topa te' xat, pu Nemi yōg 'āmānex xop tu hām, pāyā nōm xop pu hām'āktux 'ūm xex 'ohnāg, pu tu hāpxopmā kux. 'Āmhok.

21 Pāyā hām'āktux xex 'āmānex nōy pu', yā Yeyox mūn pu hām'āktux xex, hu:

“Topa te xa hām'āktux xex,

tu yāy pu' hupmāp-tup 'ohnāg, tu:

“Amūn yā 'āmānex xe'e', 'ap 'ākux 'ohnāg.’ ” Kaxīy.

22 Hu Yeyox mūn yā 'āmānex xe'e', tu' pa'ax tūmnāg yōg 'āmānex, yā' pa'ax tup mūn max xe'e', ha' pa'ax hittap mūn miax.

23 'Ūyōg 'āmānex xop xohix punethok, 'ūxakix tu', yī' nōy mōxaha', nūy tu hām.

24 Pa Yeyox hi mō kuma' mōg, 'ūxok putup 'ohnāg, yī' nōy nūn 'ohnāg, nūy yānān tu tu' hām, pāyā Yeyox yā 'āmānex yāp-xet,

25 tu hōnhā tikmū'ūn kuxa kummuk xit'ax, xix hāptup 'īhā' xit'ax, 'ap kux'ah, tu nōm xop kuxa te Topa xak xop mō'nīynām, puyīy Topa yīkāgnāg hā nū'. Ha Yeyox te nōm pupi' xak, nūy mō'nīynām, yā' hi mō kuma' mōg, nūy Topa tu' xax, pu mō tu xape nīynām.

26 Hu Yeyox yā 'āmānex xat'ax xe'ēgnāg, ha yūmūg xohix tep-tup pax, ha hāpkummuk mīy 'ohnāg, yā' max xe'ēgnāg. Topa te Yeyox yāy kutnāhā', tu' xut, tu' xexkanā xe'ēgnāg, pu pexkox yōg xop hā tu xexka'.

27 Ha 'āmānex xat'ax nōy te mō'āp xop hap, nūy Topa pu' haxyā', tu 'āmnīy tu xohix puxix mō'hap, puyīy yāy yōg hāpkummuk mīy'ax xaxogā', xix tikmū'ūn xohix yōg mīy'ax xaxogāhā'. Pa Yeyox yāy pu mō'hap 'ohnāg, hāpkummuk mīy 'ohnāg tu', tu tu yāy mūn hōm, tu' xok 'āmnīy puxet 'īhā', nūy tikmū'ūn yōg hāpkummuk mīy'ax xaxogā', pu tu kux.

28 Ha Mōyyex te' xat, pu tik xop yīmōgatux, pu tikmū'ūn nō 'āmānex xat'ax, ha' max miax, pa Topa te hām'āktux xex 'ūk-nāy tu', tuk-tok yā hāmyāy kutnāhā', yā Topak-tok max xe'ēgnāg mō kuma' mōg.

## 8

### *Yeyox yā yūmū yōg 'āmānex xe'ēgnāg*

1 Yeyox mūn yūmū yōg 'āmānex xe'ēgnāg, yā pexkox tu' xip, tu Topa xexka xe'ēgnāg yīpxe'e hā'

yūm, nūy nōm mūtik tu xexka'. Yā hāmyūmmūg xe'e 'ōhōm.

<sup>2</sup> Hōmā hāmyāxatamuk xohix 'ihā Yoneo yōg 'āmānex te Topa pet hā mō'nāhā', tikmū'ūn te nōm pet mīy topixxax ka'ok hā, pu tu xokxop hep 'ūm nūnnāy. Pāyā yūmū yōg 'āmānex xat'ax, tu' hām pekkox kopah, yā nō'ōm Topa xip'ax xe'e', tu pekkox tu' yūm.

<sup>3</sup> Topa te 'āmānex xat'ax xop xohix yīmōgatux, pu hāpxop xix xokxop mō'hap, nūy Topa pu haxyā', nūy Topa pu' hōm, yīy yūmū yōg 'āmānex xat'ax hām kamah, nūy Topa pu yāy mūn hōm, nūy yūmūg xohix pupi tu xok.

<sup>4</sup> Pax pu Yeyox hām tu' xihip, puxix yūmū'ā hā 'āmānex hok. Yā Mōyyex te' xat, pu mōnāyxop Nemi mōkputox tu tu' hām, nūy mō xokxop hāp, nūy Topa pu' haxyā', ha Yeyox yā Nemi yōg xop hā' puknōg.

<sup>5</sup> Ha Topa te Mōyyex xat, pu topixxax ka'ok xexka hā Topa pet mīy, tu' mīy'ax yūmmūgāhā', ha' mīy, ha' pet te pekkox yōg pet hā pet komut.

<sup>6</sup> Pa Yeyox te 'āmānex yōg hāpxopmā'ax mīy, tu' māynāg mīy, yā 'āmānex xat'ax xe'ēgnāg, hu' pa'ax tup mīy Topa mūtik, xix tikmū'ūn mūtik, Topa te hām'āktux xex ha' pa'ax mīy. Yā pa'ax hittap yōg max miāx, ha pa'ax tup yōg max xe'ēgnāg.

<sup>7</sup> Pax pu' pa'ax hittap tu ka'ok xe'ēgnāg, puxix pa'ax tup mīy hok,

<sup>8</sup> pāyā Topa te tikmū'ūn yūmmūg, ha hāpxopmā kummuk punethok, yīy Topa te:

“Āmnīy mō'nāp-tup, 'ihā 'āte pa'ax tup mīy'ax,  
 'Iyaet yōg tikmū'ūn mūtik mīy'ax,  
 xix Yona yōg tikmū'ūn mūtik mīy'ax.

9 Yā' pa'ax nōy, 'ūtup, ha 'āte nōm hittap mīy  
mōnāyxop mūtik,  
nūy mōgā', nūy hāpxexka 'Eyit tu 'ūxupmā',  
pa mōnāyxop tek xaxok, tuk pa'ax xaxok kamah,  
yīy 'ātep-tup nōg," kaxīy.

10 Tu xe hām'āktux, hu:

“'Āte pa'ax tup mīy putup,  
tu 'Iyaet yōg tikmū'ūn mūtik yōgnū hām'āktux xex  
putup,  
'āte tikmū'ūn putox tu' xex putup, xi' kuxa kopa'  
xex,  
'āte nōm tikmū'ūn hā Topah,  
hak mūn hā yā tikmū'ūn xe'e, 'ūyānān tu'.

11 Tute hāmyūmmūg putup, yā' xohix tek yūmmūg  
putup,  
hu' nōy yūmmūgā'ax hitop tu',  
'a hām'ūm 'āktux putup'ah, nūy: 'Topa yūmmūg.'  
Kaxīy.

Yā' xohix tek yūmmūg putup, 'ūk-tōgnāg xop tek  
yūmmūg nām,  
ha mōktu xexka xop tek yūmmūg nām.

12 Ha 'āte hāpkummuk mīy'ax xaxogāp-tup, pu tu  
kux," kaxīy.

13 Hāpxop kutut te yāy xaxogā tāmnāg, Topa te'  
pa'ax hittap kux, ha yāy xaxogā'ax, yīy pa'ax tup  
mīy.

## 9

### *Tikmū'ūn kuxa te' yēy Topa keppah*

1 Nōm pa'ax hāmāxap te Topa pu nū'xup  
yūmmūgāhā', ha tikmū'ūn te Topa pet mīy, nūy  
Topa pu nū'āxup, 'ūpa'ax te' pet mīy yūmmūgāhā',

<sup>2</sup> Ha Topa pet kox hã mōxakux hãmãxap, ha top-ixxax ka'ok xexka hã' mīy, ha' xuxet'ax mīy, hu: Topa xip'ax. Kaxīy. Ha kuyãnãm kup yũm, xix mĩmpe xup, ha mĩmpe yĩmũ pãm mãm, tu Topa keppa' mãm.

<sup>3</sup> Ha topixxax max te hãmyĩkox nõy mō'yĩnnĩn, ha' pet kox 'ãxet'ax Topa xip'ax xe'ëgnãg,

<sup>4</sup> ha' kopa' xup mĩmpe', tu pipkup yãnãm hã mō'nīy, pu mĩm xax mō'hap, xix mō xokxop hap, nõy Topa pu haxyã', ha' pa'ax yōg mĩpkox yũm, ha pipkup yãnãm hã' mīy, tu mĩpkox kopa nax mãynãg yũm, ha' xit'ax 'ãxet'ax mãnãg xex nax kopah, yã pãm putuk, xix mōnãyxop 'Anãm yōg kup tōy xex mĩpkox kopah. Hõmã mĩxux te nõm kup tōy nak tu' xokax, Topa te hãm'ãktux hah, ha' xat'ax yōg mĩkaxxap yũm mĩpkox kopah, ha' xat'ax kax'ãmi' mĩkaxxap tu'.

<sup>5</sup> Ha mĩpkox yĩmũ' pip 'üyōnnã'ĩ' 2, yã pexkox yōg yōnnã'ĩ hã' komut xop, tu Topa xip'ax yũmmũgãhã', 'üyĩmãg kup te mō'kox nīy, 'õnte Topa te hãpkummuk mīy'ax xaxogãhã', pu tu kux. Yã' puxi'. 'Ãte hãm'ãktux nõy putup kamah.

<sup>6</sup> 'Ãmnīy xohix 'ĩhã 'ãmãnex xop te Topa xip'ax hã mōxakux, nõy 'ãmãnex yōg hãm'ax hã tu' hãm,

<sup>7</sup> pa Topa xip'ax xe'ëgnãg hã mōxa 'ohnãg, yã 'ãmãnex xat'ax puxehnãg te' xip'ax xe'ëgnãg hã mō'nãhã', tu hãmyãxatamuk yōg 'ãmñīy puxet, 'ĩhã Topa xip'ax xe'ëgnãg hã mō'nãhã', nõy xokxop hep 'ãta nõnnãy 'ũxip'ax kopah, tu yãy mũn pu nũ'nãhã', xix tikmũ'ũn xohix pu nũ'nãhã', pu Topa tikmũ'ũn yōg hãpkummuk mīy'ax xaxogã', tikmũ'ũn te hãpkummuk mīy hãmyũmmũg 'ohnãg tu', ha Topa

te' xaxogāhā'.

8 Ha kaxīy Topa Koxuk te yūmū'ā hāmyūmmūgāhā nōmhā, 'ūyīy yūmūg yūmmūg max, yā 'āmānex xat'ax te xokxop hep nū'nāhā', puyīy tu hām mōnāy, pāyā tikmū'ūn nōy te Topa xip'ax xe'ēgnāg hā mōxakux 'ohnāg, yā Topa te' xat hok, pu xip'ax xe'ēgnāg hā mō tu xakux hok.

9 Ha 'āmānex te Topa pu mō'āpxop hap, xix xokxop, pu tikmū'ūn Topa pu nū'āktettex, pāyā 'ap te puxi'ah, yā tikmū'ūn kuxa 'ūm tupmā 'ohnāg.

10 Yā Mōyyex te' xat hok, pu' xit'ax 'ūm mā hok, xi' xat hok, pu xo'op'ax 'ūm xo'op hok, xi' xat, pu yāy xax pix, xix kānēy pix, nūy Topa pu maxnā', pāyā yāy kuxa tupmā 'ohnāg, hu' hīp, puyīy Topa' kuxa kummuk tupmā'.

11 Yīy Kunnix nūn, tu yāyhā 'āmānex xohix xat'ax, tu yūmū'ā hāmmāxnāhā', tu Topa pet xe'e kopa' hām, ha tikmū'ūn te nōm pet mīy 'ohnāg, 'ap hām xexka tu' yūm'ah, yā pexkox tu' yūm.

12 Ha Kunnix nūn, tu' pet hā mō'nāhā yāp-xet, tu Topa xip'ax xe'ēgnāg kopa mō'nāhā', tu' hep 'āta nū'nāhā', pāyā 'a mūnūytut hep 'āta 'ūm nū'nā'ah, xix 'a mot hep 'āta 'ūm nū'nā'ah. 'Āmhok. Yā yūmūg pupi' xok, tu yāy hēp 'āta nū'nāhā', nūy yūmūg kuxa kummuk 'ūm xit, nūy tu mō kuxa max tat 'ūyānān tu', pu yūmūg hi xe'e, 'ap kux'ah.

13 'Āmānex xop nōy te mot hep 'āta nū'nāhā', xix mūnūytut pīt hep 'āte nū'nāhā', tu mūnūytut kutok pīt mō'hap Topa pu', tu xogyīn putok nū'xok tikmū'ūn tu', pu tu nō xax maxnā Topa pu', nūy tu hāpkummuk xit, pu tikmū'ūn Topa keppa nū'āktettex, nūy kuxa' yēy.

14 Topa Koxuk hi xe'ëgnãg, tu Kunnix ka'ogãhã', pu tu xok mĩpkupnix tu', tu yãy hep 'ãta nũ'nãhã', tu yãy mũn hõm Topa pu', nũy tikmũ'ũn pupi tu' xok. Ha xokxop hep 'ãta ka'ok kutõgnãg, tu tikmũ'ũn kuxa kummuk tupmã hok, pa Yeyox yãy hep 'ãta ka'ok xexka', tu yũmũg kuxa kummuk xit, tu yũmũ yõg hãpxopmã'ax hitop kuxyã', nũy yũmũg ka'ogã', yũmũ'ãte hãpxopmã Topa xe'ëgnãg pu'.

15 Yĩy Kunnix te tikmũ'ũn xapit, pu Topa hã yãy xape xop, tu' pa'ax tup hã' xape, puyĩy Topa nõm pu hãmmaxnã', tute nõm xop xãnãhã', nũy tu hãmmaxnã mõ'kuma' mõg, tu hãm'ãktux xex tap. Kunnix xok, hu tikmũ'ũn mõy pu mõg Topa yĩkãgnãg hã, nũy hãpxopmã kummuk kux, yã hõmã' mĩy, 'ũpa'ax hittap xip, 'ĩhã' mĩy.

16 Tikmũ'ũn xok putup, ha yãy xape te' yõg hãpxop xohix pop putup, yĩy tappet tu kax'ãmi', pu tikmũ'ũn xexka xop mõ'kupix, nũy yũmmũg, nũy tu' xape xop pu hãpxop popmã'. Ha' xok, puxi' xexka xop 'ũyõg hãpxop popmã', tik xape xop pu' popmã', tappet tu' kax'ãmi tap hah, tu ta' xok xe'e'.

17 Nõm tikmũ'ũn hi', ha ta' pop 'ohnãg, pa' xape xop hip, pu tu xok, ha tappet pu'uk. Pa tikmũ'ũn xok, puxix tappet ka'ok, tu' yõg hãpxop popmã'ax yũmmũgãhã', pu tu xape xop pop.

18 Hã kaxĩy 'ũpa'ax hãmãxap te' xat, pu xokxop kix Topa pu, nũy hep 'ãta nũnnãy.

19 Mõyyex te' xat'ax 'ãktux hãmãxap tikmũ'ũn pu', tuk-nãy tu mũnũytut pit xix mot kix, tu' hep 'ãta kanop kõnãg hã, tu nũ' xok, pu topixxax nõm 'ãta xup, nũy nũ'xok, xix mĩxux 'ixop hã nũ'xok, tu' xat'ax yõg tappet yĩmũ nũ'nãhã, xix tikmũ'ũn



xohix yĩmũ nũ'nãhã',

<sup>20</sup> tu: "Topa yõg pa'ax ka'ok, yĩy 'ãte nũhũ hep 'ãta nũ'xok, xa 'ãxop xohix pẽnã', nũy 'ãyĩpkox pi pa'ax tu'," kaxĩy.

<sup>21</sup> Kaxĩy Mõyyex te' xat, pu' hep nũ'nã Topa pet kopah, xix Topa xak'ax yõg kãnëy tu nũ'xok.

<sup>22</sup> Yã' xat, pu' hep 'ãta nũ'xok, pu hãpxop tu max Topa pu'. 'Ûhep 'ãta puxehnãg hã Topa te hãpkummuk mĩy'ax xaxogãhã', pu tu kux.

*Yã Kunnix te yũmũg kuxa kummuk xit, 'ũxok tu'*

<sup>23</sup> Mõnãyxop Mõyyex te' xat, pu Yoneo 'ãmãnex hep 'ãta nũ'xok Topa pet yõg hãpxop tu', puyĩy tu hãpxop maxnã Topa pu'. Tu xokxop hep nũ'xok, nũy hãpxop maxnã', xix xogyĩn putok nũ'nãhã', nũy tikmũ'ũn xax maxnã Topa pu', pãyã nõm hãmmxnã'ax te tikmũ'ũn kuxa kummuk tupmã 'ohnãg, yĩy Kunnix xok, yũmũg pupi' xok, nũy yũmũg kuxa maxnã Topa pu', tu yãy hep 'ãta nũ'nãhã', nũy pexkox yõg hãpxop maxnã Topa pu kamah.

<sup>24</sup> Yĩy Kunnix xok hãmãxap, tuk-nãy tu pexkox yõg pet xe'e hã mõktu mõ'nãhã', tikmũ'ũn te nõm mĩy 'ohnãg, ha Topa yĩpxe'e ha' yũm nũy yũmũg pupi hãm'ãktux Topa pu'.

<sup>25</sup> Yoneo xop yõg 'ãmãnex xat'ax te Topa xip'ax hã mõ'nãhã', tu hãmãyaxatamuk xohix 'ĩhã mõ'nãhã, tu hãmãyaxatamuk yõg 'ãmñy tup-xet 'ĩhã mõ'nãhã', tu Topa xip'ax kopa mõ'nãhã', tu xokxop hep 'ãta tat 'ũxeheh. Pa Kunnix xok puxehnãg,

<sup>26</sup> nũy tu' xũy puxet, tu' xok, nũy tikmũ'ũn kuxa kummuk tu xit, 'ap xep xok'ah, yã' kux, yã' puxi'.

27 'Ūhep xop xohix xakix puxet, hak-nāy tu Topa te' yōg hāpxopmā'ax kopit putup, 'ok pe hāpxopmā max, 'ok pe' kummuk, tu' kummuk xop pu hāpkummugāp-tup, nūy tu yānān, tu' max xop pu hāmmaxnāp-tup 'ūyānān tu'.

28 Ha kaxīy Kunnix xok 'āmñy puxet 'īhā', nūy hām xexka xohix yōg hep xop xohix pupi tu' xok, nūy hāpkummuk mīy'ax xaxogā', 'ap xep xok putup'ah, pāyā putpu' nūn putup, nūy yāy yōg tikmū'ūn hām tu' mōy, puyīy nū mūtik tu pip ka'ok, tu' hip nōmhā, pu nū'.

## 10

1 Mōyyex te 'Iyaet yōg tikmū'ūn xat, pu mō xokxop hap, nūy haxyā', ha' xat, nūy tikmū'ūn pu hāmyūmmūgā', puyīy 'āmānex xe'e hip, nōm te tikmū'ūn pupi' xok'ax. Yā Yeyox Kunnix mūn yūmū yōg 'āmānex xe'e, tu yūmū'ā hāmmaxnāhā'. 'Āmānex xop te mō xokxop hap pax, yā hāmyāxatamuk xohix 'īhā mō'hap, tu tikmū'ūn kuxa kummuk tupmā 'ohnāg. Yā tikmū'ūn xak, nūy yāy kuxa maxnā Topa pu', puyīy Topa yīkāgnāg hā' mōg, pāyā yāy kuxa tupmā hok.

2 Pax pu tikmū'ūn hāpxop mō'hap'ax hā' yāy kuxa tupmā Topa pu', puxix hāpkummuk mīy'ax xaxogā', ha hāpxop mō'hap'ax kuxyāhā',

3 pa tikmū'ūn te hāpxop mō'hap, nūy Topa pu haxyā', ha mō'hap'ax te yāy yōg hāpxopmā'ax kummuk xutigāhā', yī' xaxok 'ohnāg, tu hāmyāxatamuk xohix hā xe mō'hap, tu xe mō'hap,

4 Mūnūytut hep 'āta, xix mot hep 'āta te hāpkummuk mīy'ax xaxogā 'ohnāg.

<sup>5</sup> Yīy Kunnix nūn, tu yīy hām tu' nūn 'īhā, tu' Tak Topa pu hām'āktux, hu:

“Ātak, xatep-tup'ah tikmū'ūn te xokxop mō'hap, nūy tu haxyā', pak yīn mīy.

<sup>6</sup> 'Ap 'ākuxa hittup'ah, 'īhā tikmū'ūn te 'ākeppa mō'hap, puyīy hāpkummuk mīy'ax xaxogā'.

<sup>7</sup> Yīy 'āte hām'āktux, hu: 'Yāk xip, Topah, tuk nūn, nūy 'ōg putup'ax mīy, ha kaxīy tik te' xat'ax yog tappet tu kax'āmi', nūy 'ūgmūn 'āktux,” kaxīy.

<sup>8</sup> Tu hām'āktux hāmāxap, hu: “Xatep-tup'ah tikmū'ūn te xokxop mō'hap, nūy haxyā', 'Ap 'ākuxa hittup'ah, 'īhā tikmū'ūn te 'ākeppa mō'hap, nūy hāpkummuk mīy'ax xaxogā',” kaxīy. Tup-tup 'okpa' xat'ax te' xat.

<sup>9</sup> Tuk-nāy tu hām'āktux, hu: “Yāk xip, Topah, tuk nūn, nūy 'ōg 'ūm putup'ax mīy,” kaxīy. Yā kaxīy Topa te mō'hap'ax hitop kuxyāhā', nūy Kunnix 'āktux 'ūyānān tu', ha yūmūg pupi' xok.

<sup>10</sup> Yeyox Kunnix te Topa pu' yīpkox pip, hu yūmūg kuxa kummuk tupmāhā', yā 'āmnīy puxet 'īhā' xok, tu yūmūg pupi' xok mīpkupnix tu', 'a xep xok'ah.

<sup>11</sup> Yoneo yōg 'āmānex xop xohix hām, tu 'āmnīy xohix 'īhā' hām Topa pet kopah, tu mō hāpxop hap punethok, xix xokxop mō'hap punethok, nūy Topa pu' haxyā', pa mō'hap'ax te yūmūg kuxa tupmā hok. 'Āmhok.

<sup>12</sup> Yīy Yeyox xok yūmūg pupi', 'āmnīy puxehnāg 'īhā' xok, tu xehomip xok 'ohnāg, yā' puxi', 'ūkux, ha Topa yīpxe'e hā' yūm, nūy nū mūtik tu' xexka',

13 tu' hip, pu Topa tu ta tu gāyxop nōā', tu' kum-mugāhā 'ūyānān tu', puyī' xohix yīpkox pi Yeyox xat'ax pu'.

14 Ha Yeyox xok puxet, nūy tikmū'ūn kuxa tupmā, pu kuxa tu max Topa pu', yīy hōnhā Topa yīkāgnāg hā' pip.

15-16 Ha Topa Koxuk te hām'āktux hāmāxap, tu tikmū'ūn kuxa tupmā'ax 'āktux, hu:  
 “Hāmyāxatamuk xohix nōg, kopxix pa'ax nōy mīy, yā Topa te' xuktux, tu yā yōgnū xat'ax xex putup, tikmū'ūn putox tu' xex putup, xi' kuxa kopa' xex putup,” kaxīy.

17 Tuk-nāy tu hām'āktux, hu: “Āte' xaxogāp-tup 'ōg hāpkummuk mīy'ax, xix 'ōg hāpkummugā'ax 'āte' xutigā 'ohnāg,” kaxīy.

18 Tu hāpkummuk mīy'ax xaxogāhā', ha' kux, 'ap xe mō'hap'ah, 'ap xehomi xokxop mō'hap putup'ah. Yā' puxi'.

### *Topa yīkāgnāg hā yūmūg pip*

19 Yīy yūmūg mōg Topa keppah, nūy nū mūtik hām'āktux. Yā Yeyox Kunnix xok yūmūg pupi', nūy yūmūg nūnnā', 'ūyīy yūmūg mōg, nūy Topa mūtik hām'āktux, tu kuxānōg 'ohnāg.

20 Hōmā topixxax max te nōm hāmyīkox mō'yīnnīn, pu tikmū'ūn mō tu xakux hok, ha Yoneo yōg 'āmānex xat'ax te' xut, nūy mōnāy, ha kaxīy Yeyox xok, yūmūg pupi' xok, nūy yūmūg mōgā Topa yīkāgnāg hā', nūy yūmūg hi xe'ēgnāg.

21 Ha yūmū yōg 'āmānex xe'ēgnāg te Topa pet xe'ēgnāg kopa' xat, tu pexkox tu' xat, 'ūxuxet'ax Yeyox Kunnix.

22 'Āpu yūmū mōg Topa yīkāgnāg hā, pāyā yā yūmūg kuxap-xet, tu yāy pu mō'āmā hok, 'ūmām ka'ok tu', Topa te yūmū yōg hāpkummuk mīy'ax xax-ogā hah, pu tu kux, ha yūmūg putox pix, 'ū yūmū hāpxopmā kummuk kux, 'ūyīy yūmūg hāpxopmā max 'ūyānān tu'.

23 Topa te hām'āktux xex, 'āpu yūmūg kuxa mām ka'ok nōm hām'āktux kopah, Topa te yā koit 'ohnāg, yīy 'ūgmū'āte' hip, pu Topa yūmū'ā pexkox yōg hāpxop popmā', ha yūmūg nōy pu' xuktux.

24 'Āpu, yūmūg xape kuxa ka', nūy 'ūm hāk tehet, 'ūp-tup pax tu', nūy tu xape hā hāmmaxnā'.

25 'Ūkuxa mām ka'ok xop te yāykotīnnā' pip, ha ta mōy kamah, nūy nōm xop mūtik pi', nūy Topa pu hām'āktux. 'Ūxaxok hok. Tikmū'ūn nōy mōg'ax kuxyāhā', 'a' max'ah. Pāyā 'āmōg pax, nūy 'ānōy mūtik Topa tu 'ākax, nūy mō yāy nīynām. Yā yūmūg xuxyā nūn putup, yīy yāy tu nū'nā' pax.

26 Topa te xa hāmyūmmūgāhā', yīy 'āxop te' yōg hām'āktux xe'e yūmmūg, hu hāpkummuk mīy kux, nūy xehomip hāpxopmā kummuk hok, 'ūp-tup hu' mīy hok, ka Topa 'ōg hāpkummuk mīy'ax xe xaxogā hok. Pāyā' xax, xa Topa pu hāpxopmā max. Yā Kunnix xok tap, xayīy 'āxop hāpkummuk mīy'ax kux.

27 Hu 'ākuxānōg, yā Topa te 'ōg hāpxopmā'ax kopit putup, tu kuxap xe'e hā' gāy xop kix xexkap-tup, yā Topa te' yīpkox hok xop nōāp-tup kuxap xe'e hā.

28 Yoneo yōg tikmū'ūn hittap te Mōyyex yōg xat'ax pu' yīpkox 'ohnāg, tu hāpkummuk mīy pax, tikmū'ūn nōy 2, pe 3 te' pēnā', puxi' xexka xop nōm putex, tu' kuxa ka 'ohnāg.

29 Topa te putep-tep mīy putup, 'lhã tikmũ'ũn te nôm kutok putup nōg? Yã nôm kummuk xop te Yeyox hep 'ãta kutōgnãg pe'paxex, hu: “Yãk-tōgnãg, pu Yeyox Kunnix 'ũgkuxa tupmã',” kaxīy. 'Ūyĩpkox hok, puxix Topa' yãnãn tu' kummugã xexka', hãpkummuk xexka mīy ha'. Yã Topa Koxuk te mō'yây xe'ëgnãg, ha tikmũ'ũn te Topa Koxuk kummuk 'ãktux, tu' mãnōg, puxix Topa' yãnãn tu' kummugã xexka', hãpkummuk xexka mīy hah.

30 Yũmũ'ãte hãmyũmmũg, tu Topa te hãm'ãktux yũmmũg, ha: “'Ãte hãpkummugãp-tup 'ũyãnãn tu', nũy tu nōy yōg kummuk mīy'ax tu pago,” kaxīy. Tu xe: “Topa te yây yōg tikmũ'ũn yōg hãpxopmã'ax kopit putup, nũy nō hãpxopmã'ax yũmmũg, 'ok pe max, 'ok pe kummuk,” kaxīy.

31 Topa gãy tikmũ'ũn tu', tikmũ'ũn te hãpxopmã kummuk tu' gãy, yīy 'ãkuxãnōg, nũy Topa xe'ëgnãg gãyã hok.

32 Hõmã Topa te xa hãmyũmmũgãhã', ha 'ãxop xũy, ha' kummuk xop te 'ãkummugãhã', pãyã 'ãkuxa tuknōg 'ohnãg. 'Ūxaxok hok.

33 Ha' gãy xop te' yãg mãnōg, tu' xũygãhã', pu tikmũ'ũn xohi' pãnã', ha' yãg nōy xũy 'ũnōy xop mũtik, yã 'ãkuxap-xet 'ãnōy kuxa mũtik.

34 Tu kanet kopa' pip xop kuxa ka', tu 'ãkuxa hittup 'lhã' kummuk xop te 'ōg hãpxop xohix hã' xupxet, hãmyũmmũg tu hã hittup, yã 'ōg hãpxop mãyñãg pip ka'ok pexkox tu', ha' nōg 'ohnãg.

35 Yīy 'ãkuxa tuknōg hok, ka Topa yōg putat xax, ha Topa te xa hãmmaxnã xexkap-tup 'ũyãnãn tu'.

36 Hãpxopmã'ax ka'ok hã' tot, nũy Topa pu 'ãyĩpkox pi', nũy nôm putup'ax mīy, xayīy pexkox

yōg hāpxop pop, yā Topa te xa hām'āktux xex.

<sup>37</sup> Yīy Topa yōg tappet te:

“Nāy. Hāpxip kutōgnāg koxix nūn putup mō'ka'ok.

<sup>38</sup> Ha tikmū'ūn te hāmyok mīy, tu' kuxa mām ka'ok, puxix tu hi xe'e', pa tikmū'ūn te yōgnū putat xak, nūy putpu' mōg, koxix kuxa hittup 'ohnāg,” kaxīy.

<sup>39</sup> Pa yūmū'āte Topa yōg putat xak putup'ah, hu yāy 'ūm nōāp-tup'ah. 'Āmhok. Yūmūg kuxa mām ka'ok, nūy yūmūg hi xe'e, nūy Topa yōg putat hā yūmūg mō kumak mōg.

## 11

### *Tikmū'ūn kuxa mām ka'ok Topa kopah*

<sup>1</sup> Yūmūg kuxa mām ka'ok Topa kopah, hu hāmmax hip, pu Topa pexkox yōg hāpxop yūmū'ā' popmā', ha ta yūmū'āte nōm hāpxop pēnā hok nōmhā.

<sup>2</sup> Yā mōnāyxop hittap kuxa mām ka'ok kamah, yīy Topa tep-tup pax.

<sup>3</sup> Yūmūg kuxa mām ka'ok, hu hāmyūmmūg, yā Topa te pexkox mīy xix hahām, yā hāpxop xohix mīy, hām'āktux'ax hā' mīy, tu hāpxop pēnā hok hā hāpxop mīy, pu tikmū'ūn pēnā'.

<sup>4</sup> Yā mōnāyxop hittap 'Ameo kuxa yūm ka'ok, hu mō kahnēn hap, nūy Topa pu haxyā', ha Topa tep-tup pax, pāyā' taknōy Kāyīy yōg mō'hap'ax putup 'ohnāg. Ha 'Ameo te hāmyok mīy, 'ūkuxa yūm ka'ok tu', ha Topa tep-tup pax, ha yūmū'ā hāmyūmmūgāhā'.

<sup>5</sup> Xix mōnāyxop hittap 'Ēnōg kuxa yūm ka'ok, hu' xok 'ohnāg. Yā Topa te hām tu' xut, nūy pexkox ha' mōgā', ha tikmū'ūn te 'Ēnōg xak, nūy tu pēnā', pa'

pēnā'ah, ha' kux. Ha Topa yōg tappet te: “Topa te 'Ĕnōg putup pax,” kaxīy.

<sup>6</sup> Tikmū'ūn kuxa yūm hok, puxix Topa nōm putup nōg. Pāyā tikmū'ūn kuxa yūm ka'ok tu: “Yā Topa xip!” kaxīy, tu Topa xak, puxix Topa nōm tikmū'ūn ha hāmmaxnā'.

<sup>7</sup> Xix mōnāyxop hittap Nōe kuxa yūm ka'ok, hu Topa te nōm pu hāmyūmmūgāhā', tu 'āmnīy mō'nā'ax yōg hāpxopmā'ax yūmmūgāhā', ha' yīpkox xip, tu mīpkox xexka mīy, kōnāg xexka yīmū' mōgāhā', pu nōm mōnāy, nūy kopa' pi', xi' xape xop te' kopa' pi', nūy kōnāg hā mō' tutnā hok, puyīy tu xakix hok. Ha kaxīy Nōe te Topa hā' puknōg xop yā' kummuk 'āktux, 'ūkuxa mām'ohnāg hah, ha Topa te Nōe kuxa tupmāhā', 'ūkuxa yūm ka'ok hah.

<sup>8</sup> Xix mōnāyxop hittap 'Amanām te Topa te' xānā'ax 'āpak, tu' yīpkox xip, hu' mōg hāptox ha, Topa te hām'āktux xex hah. Ha' kuxa yūm ka'ok, tu yāy yōg hām nīm, tu piyā' mōg yūmmūg, 'okpa' mōg,

<sup>9</sup> tu' kuxa yūm ka'ok, hu' puknōg xop mūtik tihī', ha Topa te 'Amanām pu nōm hām xexka hōm putup. Tu topixxax ka'ok hā' pet, 'ūk-tok 'Iyak mūtik, hak-tok Yako pet kama topixxax ka'ok hā, ha Topa te nōm mūtik hām'āktux xex kamah, nūy tu hāpxexka hōm.

<sup>10</sup> Yā 'Amanām te' hip, nūy Topa yōg kōmēn xe'e tu' xhip, ha pexkox tu' yūm kōmen, ha' koxyōy hok, Topa te' mīy hah.

<sup>11</sup> Xix mōnāyxop hex Xat kuxa yūm ka'ok kamah, huk-tok put, tu ta kutut, tu Topa yōg hām'āktux xex yūmmūg, tu' kuxa yūm ka'ok, pu Topa 'ūk-tok putnā.



12 Hã kaxĩy 'Amanãm kutut, tu' pu'uk, pãyã' mőkputox xohix xexka punethok, mãyõnnãg putuk, xix hãpkux yõg 'ãmot xohix putuk.

13 Ha nõm xop kuxa mãm ka'ok, tu mõktu' xakix, tu Topa yõg hãpxop 'a' pop'ah, pa hãptox tu' pẽnãhã', tu hãmyũmmũg, tu yãy mũn puknõg 'ãktux, tu hãmyãxatamuk xohix hã hãpkumep, tu' pet 'ohnãg hãm xexka tu',

14 tu hãm'ãktux, tu yãy yõg hahãm xak pexkox tu',

15 'a putpu' mõg putup'ah. Pax pu yãy yõg hãm hittap xax, nõy putpu' mõg, puxi' mõg,

16 pap-tup nõg, tu pexkox tu hãm nõy xak, nõy ta tu' pi', ha Topa te nõm tikmũ'ũn hã Topa xe'ëgnãg, tu nõm tu yãyhãhup 'ohnãg, hu kõmẽn xe'ëgnãg mĩy pexkox kopa, tu ta tu tu' pip ka'ok.

17 Xix 'Amanãm kuxa yũm ka'ok, yĩy Topa te' yõg hãpxopmã'ax kopit, tu' xat, puk-tok 'Iyak mõ'hap, pu Topa 'Amanãm kuxa kopit, nõy ta tu hãmyũmmũg, 'ok pe 'Amanãm yĩpkox xip, 'ok pe' yĩpkox 'ohnãg. Hõmã Topa te hãm'ãktux xex tap, ha 'Amanãm mőkputox punethok 'ãktux, pa 'Amanãm yĩpkox xip, tu mők-tok puxehnãg hap'ax,

18 'ĩhã' kuxa yũm ka'ok hãm'ãktux xex'ax kopah, ha: “Ãk-tok 'Iyak hã 'ãmőkputox tu punethok,” kaxĩy.

19 Pa 'Amanãm te Topa yũmmũg, tu tikmũ'ũn putpu hĩnnã'ax yũmmũg, Pax puk-tok xok, puxi' tak putpu' put, ha 'Amanãm kuxa yũm ka'ok.

20 Xix mõnãyxop 'Iyak kuxa yũm ka'ok, hu Topa te hãmmaxnã'ax 'ãktux 'ũk-tok Yako pu', xik-tok 'Eyao pu' xuktux,

21 Xix mōnāyxop Yako kuxa yūm ka'ok, tu' xok putup, 'ihāk-tok Yoye kutok pu hāmmaxnā'ax 'āktux, tu kup tōy tu' xup, 'ihā' kuxa te' yēy Topa keppah.

22 Xix mōnāyxop Yoye kuxa yūm ka'ok kamah, tu' xok putup, 'ihā' āmnīy mō'nā'ax 'āktux, tu tikmū'ūn te hāpxexka 'Eyit tu nū'pa'ax 'āktux, tu' xat, pu' yōg xokxax mō'tat, nūy hāpxexka nōy tu nō hāpkot.

23 Ha tik te hāpxexka 'Eyit yōg tikmū'ūn xohix xat, tu xonat xop xat, pu 'Iyaet yōg tikmū'ūn kutok pit xop xohix kix, 'ihā' tut te' put, ha mōnāyxop Mōyyex mūg tak, xi' mūg tut tek-tok pit put, tu' xaptop, tu mēy 3 hā' xaptop, puyīy xonat xop pēnā hok. Yā māynāg kakxop, yī' tak xi' tut te' xat'ax pu yīpkox 'ohnāg, tu' xaptop, puyī' gāy xop 'ūk-tok putex hok.

24 Xix Mōyyex kuxa yūm ka'ok, tu' tuk, tu mōktu xiptap, tu' xat'ax kutok hex nīm, pu tikmū'ūn te yā' xat'ax kutok hex kutok 'āktux hok,

25 Yāp-tup, tu Topa yōg tikmū'ūn mūtik xūy putup, tu hāpkute'ex kummuk putup nōg,

26 tu hāmpē'paxex, hu: “Yā' max Topa yōg yīmōgatux xop hāk xūy, pāyā' kummuk, 'āte hāpxexka 'Eyit yōg tayūmak xohix pop,” kaxīy. Tu pexkox yōg hāpxop puxet xak, puyī' pa'.

27 Yā' kuxa yūm ka'ok 'ihā hāpxexka 'Eyit nīm, tu tik te' xat'ax yīpkutuk 'ohnāg, xi' gāy'ax yīpkutuk 'ohnāg, tu mō'kuma' mōg, tu Topa 'ātigāhā', 'ihā' pēnā hok,

28 tu' kuxa yūm ka'ok, tu 'āmuk xexka hāmāxap mīy 'ūxuxet'ax Nōā'yēn, ha' xat, pu hāmyāxatamuk xohix 'ihā' mīy, tu' xat, pu kahnēn hep 'āta hā mō'yīnnīn'ax muk, pu pexkox yōg nū'kutnā'ax mō tu nā hok, nūy tikmū'ūn kutok hāmāxap xohix kix hok.

29 Xix 'Iyaet yōg tikmũ'ũn kuxa mām ka'ok, hu kōnāg xexka 'Āta xak, ha hāmnaċ, tu' xup 'ohnāg, 'Īhā tikmũ'ũn te' xak. Ha 'Eyit yōg xonat xop xak putup, ha ta kōnāg xexka te mō'nīy, ha kōnāg hāp nūm, tū kopap-nūm.

30 Xix 'Iyaet yōg tikmũ'ũn kuxa mām ka'ok, tu kōmēn xexka Yenikot yīmap hā' mōg, tu xe' mōg, tu mōktu xohix te 7, ha kōmēn hām'āta ka'ok, tu kōmēn xohix yīmap, tu yāy koxyōy, ha': No'!

31 Xi' xotit Ha'ap kuxa yūm ka'ok, ha ta 'Iyaet yōg tik 2 te kōmēn puknōg Yenikot ha' nūn, nūy puknōg yōg kōmen pēnā', ha Ha'ap te tik pēnā'ax 2 xaptop, puyīy xonat xop kix hok, yīy Ha'ap 'a xok'ah, pāyā Yenikot yōg tikmũ'ũn xohix xakix.

32 'Āte putep mūn 'āktux'ax? Yā hām'āktux tox 'ātep-tup'ah, nūy Yine'ām 'āktux, xix Manak 'āktux, xix Xānxām 'āktux, xix Yepete 'āktux, xix Namix 'āktux, xix Xāmō'eo 'āktux, xix Topa pupi hām'āktux'ax xop 'āktux.

33 'Ūxohix kuxa mām ka'ok, hu hāpxexka yōg tikmũ'ũn xohix mūtik yāytuk-mīy, tu hām paha', ha' mōg, ha hāpxopmā max, yīy Topa te tu' hāpxop popmāhā', hām'āktux xex tu tu' popmāhā', ha Topa te' ka'ogāhā', pu tu hāmgāy yīkox mō'yīnnīn, pu' kix hok,

34 ha kuxap xexka kuxyāhā', tu' xupaha', pu mīkax xexka hāp-tex hok, ha' pu'uk, ha Topa te' ka'ogāhā'. Yā' puknōg xop mūtik yāykix tu mōktu hām paha'.

35 Ha 'ũn kuxa mām ka'ok, yī' xape te putpu hi', 'ūxakix ka'ok, tu putpu' hi'.

Ha' gāyxop te' yāg xūygāhā', tuk-te'ex kummuk,

tu mōktu' kix, ha' xupmāp-tup 'ohnāg, nūy tu hi xe'ēgnāg.

<sup>36</sup> Ha' gāyxop te' yāg pu' hupmāhā', tu' kix kak-ixnāg, tu' yāg nōy hīy, nūy kanet kopa nū'xok,

<sup>37</sup> tu' yāg nōy kix mīkaxxap putux hā, xi' yāg nōy pot xehot hā', xi' yāg nōy kix mīkax xexka hā. Ha hāpkumep hitop tu', tu kahnēn xokxax mō'tat, xix mot xokxax mō'tat, tu hām hok, ha' xūyghāhā', tuk-te'ex kummuk,

<sup>38</sup> ha hām panip tu hāpkumep, tu yīktix pepi' mōg, tu hāpkox kōpa' pet. Tu' max, ha hām xexka yōg Topa hā' puknōg xop kummuk.

<sup>39</sup> Ha' kuxa mām ka'ok, yīy Topa tep-tup pax, tu nōm pu hām'āktux xex, pa Topa yōg hāpxop 'ap pop'ah.

<sup>40</sup> Yā Topa te nōm xop hipmāhā', pup-xehnāg hā' pop hok, pāyā' hip, nūy yūmūg mūtik pexkox yōg hāpxop xohix pop.

## 12

### *Topa te yūmū'ā hā 'Ātak*

<sup>1</sup> Yā nōm tikmū'ūn xohix te' hip, 'ūyīy yūmūg kuxa mām ka'ok, yūmūg xape hittap kuxa mām ka'ok putuk, 'ūyīy yūmūg xohix pexkox yōg hāpxop pop. Yūmūg mōg mō'ka'ok Topa yōg putat hā, kopxix hāpxop putux nīm, nūy mōg xupmān. Yā kaxīy yūmū'āte hāpkummuk mīy hok, nūy Topa puk yīpkox pi'. Yā hāpkummuk mīy'ax te hāpxop putux putuk, yīy mīy hok, 'ūyīy yūmūg mōg mō'ka'ok Topa yōg putat hā', tu kuxānōg 'ohnāg.

<sup>2</sup> Yeyox pe yūmūg paxeh, 'īhā yūmūg mōg. Yā Yeyox mūn te yūmūg kuxa mām hāhā', 'ūyīy mām

ka'ok nôm kopah, ha yũmũg ka'ogãhã', 'ũmõg Topa yõg putat hã yũmũg. Yeyox kuxa tuknõg 'ohnãg, tu' xok mĩpkupnix tu', yũmũg pupi' xok, tu' xũy xexka', pãyã yãy pe'paxex, hu: "Yãk xũy kutõgnãg," kaxĩy, 'ĩhã' gãy xop nôm pu' hupmãha'. Pãyã Yeyox kuxa hittup xexka', tu Topa hip tu', pu Topa pexkox yõg hãpxop popmã', ha Topa yĩpxe'e hã' yũm nõmhã, nũy yãy 'Ătak mũtik tu xexka pexkox kopah.

<sup>3</sup> Yeyox yãy xũy'ax pe tu paxeh, xi' kummuk xop gãy'ax pe tu paxeh. Yã Yeyox xũy punethok hã' tot, 'ũyĩy kamah yũmũg kuxa tuknõg hok, nũy Topa yõg putat xak hok.

<sup>4</sup> 'Ăxop te yãy putup'ax mĩy kutõgnãg. Topa pu 'ãyĩpkox pip, pãyã kama yãy putup'ax mĩy. Yã' max xa Topa putup'ax puxet mĩy, xayĩy hãpkummuk mĩy'ax xohix tu kux.

<sup>5</sup> 'Ok 'ãxop te Topa yõg hãm'ãktux xaxok? 'Ăxop yã Topa hã 'ãk-tok xop, yĩy xa hãm'ãktux, hu:

"Xonnẽ', 'ũg'ãpax! 'Ăkuxa tuknõg hok 'ãte 'ãmãnõg hah.

<sup>6</sup> Yã 'ãmãnõg, nũy xa hãmyũmmũgã', xayĩy 'ãmax, 'ãmũn yãk mũn hã 'ãk-tok xop tu', ha mõi'ãyãy xe'ẽgnãg," kaxĩy.

<sup>7</sup> 'Ăxũy, tu xa hã' tot, Topa yã 'ãxop hã 'Ătak, tu xa hãmyũmmũgãhã', 'õg 'ãtak putuk. 'Ok xip kaxxop 'ũm, 'ũyõg 'ãtak te nôm mãnõg hok? 'Ap xip'ah.

<sup>8</sup> Pax pu Topa 'ãmãnõg hok, yĩy ta 'ãxop 'a Topak-tok'ah, hak-tok xohix mãnõg, nũy tu hãmyũmmũgã', puyĩy hãpxopmã max 'ũyãnãn tu'.

<sup>9</sup> Yũmũg tak xohix te yũmũg mãnõg, nũy tu hãmyũmmũgã', ha yũmũg yĩpkox pip, tu' tak max

pekpaxex. Yīy 'āpu yūmūg Tak Topa pu 'āyīpkox pi', xayīy 'āhi xe'ēgnāg.

<sup>10</sup> Yūmūg tak te yūmū'ā hāmyūmūgāhā', 'ihā yā yūmū'ā hā kakxop, hāmyok tu hāmp'e'paxex hah, pa Topa te hāmyūmmūgāhā' 'ū yūmūg tu max, nūy Topa putuk yūmūg tu max xe'ēgnāg.

<sup>11</sup> Topa te yūmūg mānōg, ha yūmūg kuxa hit-tup 'ohnāg, pa hāpxip kutōgnāg, 'ihā yūmūg kuxa mām, ha yūmū'āte hāpxopmā max, tu hāmyok mīy 'ūyānān tu'.

### *Topa te hāmyūmmūgāhā'*

<sup>12</sup> 'Āyok, 'āknīhā xihip, 'ākuxa tuknōg hok, nūy Topa yōg putat hā mōg.

<sup>13</sup> Tu hāmyok hā mōg, nūy tikmū'ūn pu'uk mōgā max, nūy nōm ka'ogā'.

<sup>14</sup> Tikmū'ūn te 'āyīmap hā' pip, yīy nōm mūtik yāytuk-mīy hok, pāyā hāpxopmā max, xayīy Topa pēnā'. Yā hāpxopmā'ax kummuk xop te Topa pēnā hok.

<sup>15</sup> Topa te xa hāmmaxnāhā', 'ōg pa 'āti', nūy Topa yōg putat xax hok, xa tikmū'ūn kummugā hok, xix xūygā hok, ka 'āxop mīnta xūy putuk, nōm te tikmū'ūn xūygāhā', yā 'ānōy pu' xūygā hok.

<sup>16</sup> 'Ōg pa 'āti', nūy 'ānōy hā xupxet hok, xix Topa yōg hāpxop 'āktux kummuk hok, 'Eyao putuk. Tik hittap 'Eyao yā mōnāyxop 'Iyak kutok hāmāxap, tu yāy tak yōg hāpxop xohix pop'ax. Ha Topa te hām'āktux xex tap, tu 'Iyak kutok hāmāxap ha hāmmaxnā'ax. Pāyā 'Eyao kummuk, tu' tak yōg hāpxop pe'paxex 'ohnāg, 'ap hāmmaxnā'ax 'ūm putup'ah, yīy 'ūxohix nōy yānān, tu' taknōy kuhmōy

Yako mütik nõy yānān, nūy 'āmuk kutīgnāg pa', 'ūp-tup xūy tu'.

17 'Āxop te mōnāyxop yōg hām'āktux yūmmūg max. Hāpxip 'īhā 'Eyao te hāmpē'paxex, tu yāy tak yōg hāpxop xak, xix hāmmāxnā'ax xak, hu xe yā nō' nõy yānān putup, tu' potaha', tu' xak, pāyā' kux. 'Ap xe' nõy yānān'ah.

18 'Āxop te Topa yīkāgnāg hā 'āpip. Yā 'Iyaet yōg tikmū'ūn hittap te yīktix Xināy kaka' pip, tu hāpxahīgnāg tu' pip, tu yīktix mō'kāmānāg pēnāhā', tu Topa yōg kuxap xexka pēnāhā', tu hāptup 'īhā hāpkoxtap pēnāhā', xix texgāy tu' yānām pēnāhā', tu kuxānōg xexka'. Pāyā 'āxop te nōm hāpxopmā ka'ok pēnā 'ohnāg nōmhā, yā 'ākuxānōg 'ohnāg.

19 Ha nōm tikmū'ūn te mīxux xop tu kāyā'ax 'āpak, xix Topa yīy 'āpak, tu hām'āpak, tu kuxānōg xexka', hu' xak, puyīy tu yīy hok,

20 Topa yīy hā' tot 'ohnāg hah, ha' xat, hu: “Yīktix 'āpit hok, pe tikmū'ūn, pe xokxop, ka mīkaxxap hā tikmū'ūn 'ātux, tu 'āp-tex!” kaxīy.

21 Tikmū'ūn te Topa yōg hāpxopmā ka'ok'ax pēnāhā', tu' kuxānōg xexka', yīy Mōyyex te: “Āte yāy puxu'ux, 'ūgkuxānōg tu'!” kaxīy.

22 Pa 'āxop kuxānōg 'ohnāg, yā yīktix Xiām tu 'āmōxaha', Topa xe'ēgnāg yōg kōmēn tu 'āmōxaha', pexkox yōg kōmēn Yenoyanēn tu 'āmōxaha', tu pexkox yōg nū'pok xop xohix punethok pēnāhā',

23 xix Topak-tok xop te māxap pēnāhā', ha yāy tu nū'nāhā', tu' kuxa hittup xexka'. Yā Topa te nōm xop 'āxet'ax kax'āmi pexkox kopah, pu yāy mütik tu pip ka'ok pexkox tu', xix 'āxop te Topa pēnāhā', ha' pa te hāmyūmmūg, tu' hep xop xo-

hix yōg hāpxopmā'ax kopit putup, tu tikmũ'ũn yōg mĩy'ax xohix tu pago. Xix tikmũ'ũn xakix xop pēnāhā', ha hāmyok mĩy, yā' kuxa tup, Topa te' tupmāhā', pu tu kuxa max xe'ēgnāg.

<sup>24</sup> Xix Yeyox pēnāhā', ha' pa'ax tup mĩy, tu' xok yūmūg pupi', tu yāy hep 'āta nũ'nāhā mĩpkupnix tu', yā tik hittap Kayīy gāy, tu' taknōy 'Ameo putex, tu' yōg hep 'āta nũ'nāhā', pāyā Yeyox hep 'āta nũ'nāhā', pu hāpkummuk mĩy'ax xaxogā'.

<sup>25</sup> 'Ōg pa 'āti! Tikmũ'ũn yīpkox 'ohnāg, puxix tu xakix, tu mōxa hok, nūy Topa mūtik tu pip ka'ok, yīy 'āpu yūmūg yīpkox pip Topa yōg hām'āktux pu', nūy yā yūmūg hi xe'e'.

<sup>26</sup> Hōmā Topa yīy'ax te hām nuhuk, pa hōnhā Topa te: "Hāpxip 'īhā 'āte xe hām nuhuk putup, ha mōktu pexkox yāy nuhuk kamah," kaxīy.

<sup>27</sup> Tu xe hām nuhuk 'āktux, ha ta hām xexka yōg hāpxop nōāp-tup, pu pexkox yōg hāpxop tu pip ka'ok.

<sup>28</sup> Yīy 'ūyā yūmūg kuxa te Topa max 'āktux. Yā Topa mūtik yūmū'āte' xat putup, tu' xat kux 'ohnāg. Yūmū'āte Topa max 'āktux, tu nōm pu yūmūg nūktettex, nūy yūmūg kuxa' yēy, yā Topa tep-tup kaxīy.

<sup>29</sup> Hamūn. Yūmū yōg Topa ka'ok, tu kuxap putuk. Yā kuxap te hāpxop xohix nōā', ha kaxīy Topa te tikmũ'ũn kummuk nōāp-tup, nūy 'ūmĩy'ax kummuk tu pago.

## 13

<sup>1</sup> 'Āxape xop putup pax, nūy tu nōm putup kux hok. 'Ōhōm yā Kunnix yōg tikmũ'ũn, yīy 'āxop hā 'āxape'.



<sup>2</sup> 'Ăxape puknõg xapit, putnũ, nũy 'ăpet kopa xihip. Hõmã tikmũ'ũn hittap te' puknõg xop xãnãhã', nũy yãy pet tu' pi', nũy nũy mõ'nĩynãm, tu hãmyũmmũg hok, 'ĩhã pexkox yõg nũ'pok xop xãnãhã', ha tikmũ'ũn pet kopa mõ'xip.

<sup>3</sup> Kanet kopa' pip xop xaxok hok, pãyã mõ'nĩynãm, xa tep-tup kamah, pu 'ãnõy 'ãhĩy'ax xaxok hok. Xix 'ăxape xop xũy'ax xaxok hok, nũy tu mõ'nĩynãm. Xatep-tup kamah pu 'ãnõy 'ãxũy xaxok hok, nũy mõ'ãnĩynãm.

<sup>4</sup> Yã' max pu yãytax, nũy tu xetut mũtik yãy kep mũg nõm, xi' yĩpxox mũtik yãy kep mũg nõm. Topa te' nõy hã' xupxet xop kopit putup, xi' xonnix xop kopit putup, nũy nõ hãpkummugã'.

<sup>5</sup> 'Ok tayũmak putup te 'ăp-tex? 'Ũxupkumĩy hok, xix 'ãnõy yõg hãpxop putup hok, xayĩy 'õg hãpxop tu 'ãhittup, yã' puxi'. Topa te xa hãm'ãktux xex, hu: 'Ăte yã 'ãnĩm 'ohnãg, nũy 'ãmũtik 'ãti'," kaxĩy.

<sup>6</sup> Yĩy yũmũg kuxãnõg 'ohnãg, nũy tu hãm'ãktux, hu:

“Topa te mõgnĩynãm, yĩy 'ũgkuxãnõg 'ohnãg.

Yã tikmũ'ũn 'ũm tek kuxa kummugã hok,” kaxĩy.

<sup>7</sup> 'Ăpẽnã max'ax xop xaxok hok, Topa yõg hãm'ãktux xa' xuktux hah, ha' kuxa mãm ka'ok Yeyox kopah 'ĩhã' xakix, yĩy xax, xa 'ãkuxa yũm ka'ok kamah, nũy yã 'ãnõy yõg hãpxopmã'ax tat.

<sup>8</sup> Yeyox Kunnix xip ka'ok. Yã hõmã hãmyãxatamuk xohix hã' xip ka'ok, xix hõnhã' xip ka'ok, xix hãptup xohix 'ĩhã' xip ka'ok putup mõ'kuma' mõg. Yamũn yĩnmũn, tu yãyhã' nõy 'ohnãg, tu yãy yãnãn 'ohnãg.

9 Tikmũ'ũn te hãmyũmmũg kummuk hã xa hãmyũmmũgãp-tup, ha ta 'ãyĩpkox hok, pu 'ãmõgã kummuk hok. Yã Topa te yũmũg kuxa ka'ogãhã', 'ũtu max, pu yũmũg'ã hãmaxnãhã'. Ha' puknõg xop te 'ãxat, tu' xat hok, xa' xit hok, yĩy 'ãka'ogã 'ohnãg.

10 Mõyyex te Yoneo yõg 'ãmãnex xop xat hok, pu xogyĩn mõ'hap 'ax mã hok, tikmũ'ũn te Topa pu nõm xogyĩn mõ'hap, nũy haxyã',

11 ha' yõg 'ãmãnex xat'ax te xokxop hep 'ãta tat Topa xip'ax xe'ëgnãg tu', pu Topa yã tikmũ'ũn yõg hãpkummuk mĩy'ax xaxogã', pu tu kux. Ha xokxop yĩn tat, Yoneo yõg tikmũ'ũn te' pip'ax kũnãpa' tat, nũy mõy mõ'hap, ha' nõg.

12 Yĩy Yeyox xok kõmẽn xexka kũnãpa kamah, nũy yãy hep 'ãta nõnnãy, pu Topa tikmũ'ũn kuxa kummuk tupmã', pu tu kuxa max.

13 'Ãpu yũmũ mõg Yeyox hah, nũy Yeyox pe mõg, nũy yũmũg xũy kamah. Hõmã Yeyox xũy, 'ũkummuk xop te nõm pu' hupmãhã', ha' xũy, ha kaxĩy yũmũg xũy kamah, ha' kummuk xop te yũmũ'ã' hũpmãhã'.

14 Hãm xexka yõg kõmẽn xohix nõãp-tup, 'ãpu yũmũ'ãte pexkox yõg kõmẽn xax, yã nõm kõmẽn xip ka'ok, yĩy yũmũ'ãte' xak, nũy pexkox ha yũmũg mõg.

15 Hu yũmũ'ãte yãy mũn popmãhã Topa pu', nũy nõm max tãmnãg 'ãktux, tu Topa pu hãm'ãktux, puyĩ' xupax, hu: 'Ãmax xe'ëgnãg, Topah! Kaxĩy.

16 Hãpxopmã max, tu' xaxok hok, nũy 'ãnõy hã 'ãtehet. Yã Topa tep-tup.

17 'Ãpẽnã max xop pu 'ãyĩpkox pi', nũy nõ xat'ax mĩy. Nõm xop hãm Topa pu', tu 'ãpẽnãnã' pip,

tu Topa pupi 'āpēnā max, xa 'āxop mō kuma mōg  
 Topa yōg putat hā. 'Āyīpkox pi', puxix 'āpēnā max,  
 nūy yāy hāpxopmā'ax tu kux. 'Āyīpkox pip hok,  
 puxix yāy pu hāpkummugā', ha 'āpēnā'ax xop yāy  
 hāpxopmā'ax tu' kuxa hittup 'ohnāg.

18 Topa pu hām'āktux pax, nūy ta tu tu' kax,  
 puk mūg ka'ogā'. Hak mūg kuxa te yāy yīkopit, tu  
 yāy yōg hāpxopmā'ax 'āktux. Yāk mū 'āte' xak nūy  
 hāpxopmā max pax.

19 Tu xa tu' xak nām, xa 'āxop Topa tu xax, puyīy  
 mōgkutnā ka'ok 'āhah.

### *Topa pu hām'āktux*

20 Topa te yūmūg xuxyā Yeyox putpu hīnnāhā',  
 ha Topa yōg tikmū'ūn pēnānā' xip. Yā' pēnā max'ax  
 xexka'. Kaxīy tik te yāy yōg kahnēn xop pēnā max,  
 yīy Topa te' pa'ax tup mīy, ha Yeyox xok, tu' hep  
 'āta nū'nāhā', pu Topa pa'ax mīy. Ha' pa'ax kuxyā  
 'ohnāg.

21 Pūyā Topa 'ākuxa māmā', xix xa hāmmaxnā',  
 xa 'āyīpkox pi'. Pūyā Topa 'āka'ogā', xayīy hāpxopmā  
 max, nūy Topa yōg putup'ax mīy. Pūyā Topa yūmūg  
 kuxa tupmā, 'ū kuxa tu max, tuk putup tu'. Pūyā  
 tikmū'ūn xohix Kunnix max xe'ēgnāg 'āktux, nūy  
 tu' xuktux mō'kuma' mōg.

### *Tute hām'āktux kux*

22 'Ūkxape xop, 'āte xa tu' xak, xa 'āpax, nūy tuk  
 'āhā' tot. 'Āte xa kax'āmi', nūy 'āk'ogā', xa 'ākuxa  
 tuknōg hok. 'Ap tox'ah nūhū tappet.

23 'Āte xa hām'āpak'ax max 'ūm 'āktux, xayīy  
 hāmyūmmūg. Yā yūmūg xape Timōn te kanet tu' xip

tap, ha' xut pu mōg. 'ũg ha' nũn, kopxix mō'kutnã  
'ãxop hah, puyĩy 'ãpẽnã.

<sup>24</sup> 'Ãpẽnã max'ax xop xohix pu 'ãneo, xix Topa  
yōg tikmũ'ũn xohix pu 'ãneo. Hãpxexka 'Itat yōg  
yũmũg xape xop te 'ãneo kamah.

<sup>25</sup> Puyã Topa' xohix ha hãmmxnã'. Tu ta tu' kux.

**Topa Yōg Tappet**  
**New Testament in Maxakalí (BR:mbl:Maxakalí)**

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
a212b59e-62d7-5a38-9773-b0ce1d5b248b